

خطيبتى العذراء حامل



الكتاب : خطبتي العذراء حامل

الكاتب : سيد داود المطعني

تصميم الغلاف : محمد محسن

تنسيق داخلي : يوسف الفرماوي

مراجعة لغوية : سيد داود المطعني

الطبعة : الأولى ٢٠٢٠

رقم الإيداع: 2019/23362

التسجيل الدولي : 2-89-6727-977-978

الناشر : السعيد للنشر والتوزيع

المدير العام : لمياء السعيد

برج الهادي - الدور الأول - 36 ش عبد الحميد الديب - شبرا مصر

0222017260 – 01550096215

elsaidpublisher@gmail.com

جميع الحقوق محفوظة للناشر

خطيبي العذراء حامل رواية

تأليف
سيد داود المطعني



الإهداء..

إلى الحب الأول الذي لم ينته، والعشق الذي لن يزول، والروح
التي تتصل بروحي من قبل أن يتلحف جسدي نور الوجود.
إليك يا أمي..

المقدمة..

بينما أنت ساكن، هاديء، مستقر النفس، تعانق السعادة، أو تغازلها من بعيد..

تسمع أصوات عالية، فتبحث عن الرعد لا تجده، وتهتز الأرض حولك، فتبحث عن الزلزال، فلا تجد للزلزال مكان، وترى عينك لهب النيران يتفجر، فتجري تتفقد البراكين، فلا تعثر على مشهد البركان.

ما الذي أصابك فجأة؟ ..

تتوالى عليك المصائب من حيث لا تدري، وكل مصيبة هي ألعن من أختها، تكاد تفقد عقلك .. تكاد تسقط من هول ما أصابك، لا تجد المفر..

وبين هذا وذاك .. تتمسك بالبقاء، تقاوم ما أنت فيه، تهدأ قليلا..

تعطي لعقلك شارة القيادة، ليتحكم وحده في ما أصابك..

تغمض العين عن الناس، وتصم الأذن عن كلام الناس، وتتجاهلهم في الذهاب والإياب..

وفجأة..

تنطفئ أسنة اللهب، وتسكن الأصوات، وتتوقف الأرض عن الاهتزاز، وتبتسم لك الدنيا..

وتشعر كأن أرق الكائنات يقول لك..

_ قد تم حل مشكلتك بنجاح .. شكرا لصبرك..

هكذا هي الحياة .. تبتسم لمن يترث، ويصبر، ويفكر، ويتجاهل كلام الناس..

سيد داود المطعني

لا أدري لماذا يخفق قلبي هكذا، وأنا في طريقي لزيارة خطيبتي في بيت أسرتها، وكأنها المرة الأولى، ما سر هذا القلق الذي يراودني؟ والتوتر الذي يهز جوارحي؟.

قد اعتدت زيارتها كثيرا خلال تلك الشهور التي تلت الخطوبة، وأسرتها تستقبلني استقبالا يدخل السرور علي قلبي، فهم يعلمون تماما أنني أحب سلمي أكثر من نفسي وروحي، وعلي يقين أنني أسابق الزمن لأحقق ذلك الحلم الذي ينتظره الجميع، وهو إتمام الرباط المقدس بعقد القران، ليصبح كل واحد منا ملكا للآخر، دون ترتيب موعد مسبق للزيارة مرتين شهريا.

تلك الزيارة التي تجعلني أضيع وقتا طويلا في الإعداد لها، وأنا علي أحر من الجمر شوقا لرؤية نصف الروح التي طالما اشتقت لرؤيتها، وفي كل مرة، أبدع في شراء هدية مختلفة عن سابقتها لخطيبتي، تلك الهدايا التي لا تسمن ولا تغني من جوع، ولكنها تدخل السرور على فتيات هذا الجيل لا سيما المخطوبات.

أشتري مرة عروسة بلاستيكية ترتدي فستان زفاف، وأخرى دبوب مصنوع من القطن ومطرز باحترافية عالية، ولم أفكر مرة واحدة في شراء باقة من الورد للتعبير عن حبي لها ظنا مني أن الورد ليس له قيمة، ولن يفيدها في شيء، وكأن العرائس والبداديب تصنع لها ما تريد وقت الحاجة إليها .. يا لها من عادات يقلد فيها بعضنا البعض دون تمييز.

وفي يوم الزيارة ..

تعطل أسرة خطيبتني ارتباطاتها لتنتظرنني، رغم أنني لا أخصهم بزيارتي، ولكنها العادات التي تفرض عليهم انتظاري، إما للترحيب، او فرض رقابتهم على لقائي بها.

دائماً ما أذهب إليهم، أكاد أطير من فرحتي بتلك اللحظات
النصف شهرية التي تجمعي بخطيتي سلمى، وأنا أدندن أغنية
هقابلة بكرة وبعد بكرة، وأكرر كلمات أغنية بتوحشني وأنا واياك،
وغيرها من الأغاني التي تفرض نفسها علي لساني وقلبي وعقلي،
فأسمعها من موجات صوتي دون أن أرتب كلماتها، وأنا حينها أسعد
إنسان علي وجه البسيطة كلها.

حتى سلمى نفسها، التي لا تترك جهازها المحمول من يدها،
وهي تتصل بي مرارا وتكرارا لتسألني أين وصلت؟ ولماذا تأخرت؟
يدفعها الشوق لسماع صوتي، وتستعجل قدومي لتراني .

لا تترك كبيرا ولا صغيرا من أفراد أسرتها، إلا وتبلغه أني قادم
الآن، أنا علي بعد كيلو متر من منزلهم، بل أصبحت المسافة
نصف كيلو متر، بل اقتربت عشرين مترا.

تري أمها الفرحة في عينيها، وهي تهز يديها المقبوضتين علي
الهاتف المحمول، وتقول باقي من الزمن خمس دقائق، وينير
علاء منزلنا.

وأنا بين كل هذا، أسمع صوت نبضات قلبي، تفوق محرك
السيارة في ضرباتها المتتالية، أود سؤالها عن سبب كل هذا .. يداي
ترتعثان .. وأصابعي تهتز كمن يقف على أطراف البرج.
فرحة بلهاء، أو عشق بجنون، أو شوق فاق الخيال، أو كل هذا
هو سبب ما يلم بي.

توقف يا قلبي عن النبضات الخائفة، واهدأي أيتها الأعصاب
المرتجفة، واعلمي أني ذاهب إلي سلمى التي ترق أيها القلب
لسماع اسمها، وتطرب لصوتها، وتقضي أجمل أوقاتك قريبا من
قلبيها.

ما بك أيتها الأيادي المرتعشة؟ وكأنك لا تدري أنك في طريقك لمصافحة يدها، التي تسكن روعك حين تصافحك، وتنعش ملمسك لو تحسست ظهرك.

وصلت إلي منزل أسرة خطيبي ودخلت عليهم وأنا في قمة ارتبائي، عانقت خالد شقيقها الثلاثيني العمر، وصافحت والدتها الخمسينية الهادئة، وقبلت رأس والدها الرجل الطيب الذي أحبه لسماحته ونقاء قلبه، وسلمت علي سلمى سلاما عابرا كـأني لا أعرفها، صافحتها مصافحة سارقي النقود بسرعة البرق، حتي لا تراني تلك الأعين التي تراقبني داخل أروقة ذلك البيت الذي يسלט الأضواء علي الزائر النصف شهري لمنزلهم.

دخلت كالعادة إلي الغرفة الداخلية الملحقة بالصالة، والتي يستضيفون فيها الأقارب المقربين فلا هي غرفة جلوس خارجية للضيف الغريب، ولا هي غرفة لنوم فرد من أفراد المنزل وكأنهم أعدوها حين أعدوها لاستقبالي أنا فيها، لتكون الزنزانة الانفرادية التي أقابل فيها خطيبي، وسط أسرتها حراس المكان.

كانت الأسرة تلتف حولي جميعها، حسب الروتين المتبع في كل الزيارات، ثم يستأذن جميع أفراد الأسرة تباعا، حتي تظل أم سلمى هي الوحيدة بيننا، إلي أن يأتي وقت تناول طعام العشاء، فتستأذن الأم خارجة إلي المطبخ، وتشير لخالد ووالده بمتابعتنا من الصالة الخارجية التي نجلس في مقابلها تاركين باب الغرفة مفتوحا عليهم تنفيذا لأعراف مجتمعي.

خرجت والدة خطيبي من الغرفة وأتاحت لي فرصة الانفراد بشق قلبي الذي ينتظرني، وبنور عيني الذي يراقبني، وبمعشوقة روحي التي تروي ظمأي حين أركن إليها في لقائي بها.

استدرت بجسدي تجاهها غير مبالٍ بمن بالصالة من أسرتها
التي تتبادل الأدوار في المرور علينا لفرض حالة من الانضباط علي
خلوتنا المكشوفة.

نظرت إليها نظرات حائرة تبحث عن شيء ما في عينيها، أو
أبحث أنا عن إجابة لتلك التساؤلات التي تخيفني من زيارتي.

_ سلمى! هي عيلتك بتتضايق من تأخير جوازنا؟

_ إطلاقاً، دول كمان فرحانين جداً انك اشتغلت محاسب في بنك

أجنبي.

_ ساعات بحس إنهم عايزين يقولوا لي يا إما تنجز أو تبطل

زيارات.

_ تبطل زيارات ازاي يا علاء مش فاهمة؟

_ يعني بيتضايقوا من زياراتي الكثير ليكي.

_ كثير إيه بس ده انت بتيجي مرتين في الشهر وبصراحة

بتوحشني جداً يا علاء.

_ والله بتوحشيني بمجرد ما أمشي من هنا يا سلمى، ببقى

عايز أرجع تاني، أو استفز الأيام وأخليها تدخل مسابقة جري

قصادي علشان تمشي بسرعة وأجي تاني.

_ ان شاء الله ربنا يقرب البعيد واحنا نخلي الأيام تمشي

براحتها تاتا تاتا.

_ عموماً أنا قررت أوجر شقة في منطقة شغلي، وهحاول

أسحب قرض أفرشها بيه، وكله يهون علشان اللحظة اللي بنحلم

بيها.

_ متشيلش نفسك هم أكبر من همك، وكل حاجة ليها ساعة.

طرقت أم سلمى الباب ونادت علينا لتناول وجبة العشاء، التي لم أذكر أي انفردت فيها بخطيبيتي طيلة الشهور الماضية، وكم حاولت ذلك ولكن نظرية أسرتها تقول أننا الآن نعيش فترة خطوبة ولم نعقد بشكل رسمي، وقد تتعرض الخطوبة للفسخ والإلغاء، ومن باب أولى أن يحتفظوا بتلك الحيلة في التعامل، وذلك التضييق في اللقاء، حتى يتم الأمر لآخره وتتم مراسم الزواج.

لا أنكر أي أغضب كثيرا لتلك الرقابة، التي يفرضونها علي وجودي داخل البيت، حتى أنهم يرسلون أحيانا ابن عمها الطفل الذي لم يتعدى الثانية عشرة من عمره، ليلقي نظرة علي طبيعة جلستنا داخل الغرفة المفتوحة، ولكنني أشعر بفرحة غامرة بعد رحيلي، لثقتي بأبي سأتزوج من فتاة أحببتها ولم تنظر لغيري يوما، تلك نظريتي إن أخطأت فيها أو أصبت فهي مصدر سعادتي.

قمنا لتناول طعام العشاء الذي يعد بمثابة رسالة تذكير، بأن موعد الانصراف قد اقترب، فلا أنفرد بحبيبتني بعدها ثانية، إلا دقائق تجمعني بالأسرة كلها، ونحن نحتسي الشاي ليساعدنا على هضم ما أكلناه على مائدة العشاء، ويساعدهم على صرفي من البيت بعد انتهاء الكوب المخصص لي.

جلسنا على العشاء جميعا، ولم يكن خالد موجودا حينها، فجلس عن يميني والد سلمى وعن يساري الطفل وليد ابن عمها، وفي مقابلي كانت سلمى بجوار والدتها.

تناولت سلمى قطعة من اللحم ووضعتها فوق الأرز ومضغت منها طرفا صغيرا ولم تدري بالدنيا حولها إلا وهي تستفرغ كل ما بداخل معدتها من طعام على المائدة، ونهضت مسرعة إلي الحمام لتفرغ ما تزاحم على صدرها بعيدا عنا.

لم تتقدم سلمى خطوة واحدة ناحية الحمام حتى سقطت على الأرض مغشيا عليها، لا تدري بالدنيا حولها، ولا تستطيع حتى أن ترفع عينيها التي أغمضتها رغما عنها، لتغوص في عالم آخر، بعيدا عن عالمنا الذي نراقبها من خلاله.

أصابتني حالة من الذهول، ولم أشعر بنفسي وأنا ألتفت حولي كالمجنون، عن يميني وعن يساري، لا أدري ماذا عليّ أن أفعل في ذلك الموقف، الذي أتعرض له للمرة الأولى في حياتي.

ولم يكن بالمكان شابا قويا غيري، فأبوها رجل ستيني العمر، وأمها شاحصة البصر إلى ابنتها لم تستطع سوى إصدار تلك الصرخة النادبة المستغيثة، والطفل وليد لا يكرر سوى كلمة سلمى سلمى!. أخرجت هاتفي المحمول من جيبتي واتصلت بوحدة الاسعاف القريبة لتنقذنا مما نحن فيه وجثوت علي ركبتيّ ورفعت سلمى وتحركت بها ناحية الكنبة بالصالة، ووضعتها عليها، وحاولت إفاقتها ولكن دون جدوى.

أحسست بكف الموت تقبض عليها لتجذبها مني، فقبضت على يدها اليسرى، كأني أمنع الموت عن خطفها مني.

نظرت إلى عينيها المغمضتين وبينهما الموت، فشعرت بتعاسة الحياة، بل لا حياة وعين حبيبتي لا تراني، ولا ترى الحياة.

وجدتني أصرخ داعيا، ربي لا تحرمني منها، أرجوك لا تسلبني من استشعر حلاوة العيش بوجودها، يارب لا تحطم قلبي وقلب أBOيها، يارب دعها لي دعها لي دعها لي.

كنت أدعو بالفصحي تارة، وبالعامية أخرى، ولا أعرف ماذا أقول، وشعرت بمرارة العيش وأنا أراقب نصف روحي وهي تفقد الوعي وتغيب عنا، لا أدري إن كان غيابها مؤقتا ستعود بعده، أم

أنه رحيل إلى العالم الآخر لتتركني أقاسي اليتيم من بعدها، كيف لا أصبح يتيما وقد وجدت فيها أمي؟ كيف لا أتذوق المرار بعدها؟ وأنا الذي وجدت حلاوة الحياة في حلاوة روحها، ونقاء قلبها، وبراءة حبهالي، وعطفها الذي يشعرنى بطفولتي، التي باغتتني لأول مرة بعد رحيل أمي.

انفجرت في البكاء، ولم أرَ ماذا يفعل أبوها، ولم أسمع سوي صوت أمها التي تنوح وتبكي.

حضرت سيارة الإسعاف، ونقلنا سلمى إلى المستشفى، وصرخت في الأطباء صرخات طفل يستغيث بهم لينقذوا أمه، أحاول قراءة التشخيص في عيون الطبيب الذي يوقع الكشف عليها، حتي إذا ما عقد حاجبيه وأغمض عينيه، شعرت بغلق النافذة التي أتبين من خلالها الأخبار الكامنة في صدر حبيبتى، التي بدأت تشهق وتزفر بقوة، ولكن لا تكفيني حركة رئتيها، كم أود لو أنتزع تلك السماعة من الطبيب لأسمع نبضات قلبها فأطمئن بنفسى عليها.

قام الطبيب بحقنها بأمبولة جعلتها تفتح عينيها، وتلتفت إلينا وهي غير قادرة على النطق

فاكتفت بتوزيع النظرات علينا، لينال من نظراتها كل واحد منا، بقدر اشتياقه إليها وخوفه عليها، وكأنها توزع علينا حبوبا مسكنة، أو أقراصا مهدئة، لتحول قلقنا إلى سكينه، وطمأننا إليها إلي إشباع وروية.

رفع الطبيب الشاب رأسه واستدار يلتفت إلينا وهو مبتسم يحمل البشرى بداخله ليفاجئ بها مرافقى الحالة التي قام بفحصها.

_ مالكم قلقانين كده يا جماعة، ده انتوا المفروض تفرحوا
وتسمعونا زغرودة

_ زغرودة! زغرودة ليه يا دكتور؟ هي سلمى مالها؟

_ ألف مبروك يا جماعة، المدام حامل.

_ بتقول إيه؟!

_ بقول لحضرتك المدام حامل، ألف مبروك.

لم أكن أفهم ما قاله في البداية لأن عقلي لا يصدق ما يسمع،
ولكنه يتكلم وهو يعي جيدا ما يقول.

استدرت عن يميني لأرى والديها ينظران لبعضهما البعض وهما
يتصببان عرقا، وينظرون للطبيب نظرات حائرة متسائلة، مستنكرة،
يعلوها العجب، ويكسوها التكذيب، وتتخللها السخرية مما يقول
الطبيب الشاب.

نظرت إليهم لأبحث عن إجابة لحيرتي في وجوههم، فوجدتهم
ينظرون إليّ نظرات السائلين.

_ حامل ازاي يا دكتور؟ انت متأكد من الكلام اللي بتقوله ده؟

_ جرى إيه يا أستاذ هو انت هتعلمني شغلي ولا إيه؟

_ يا دكتور دي خطيبتى مش مراقتى، قول لي أي حاجة غير إنها حامل.

اندهش الدكتور ولم يستطع ابتلاع ريقه، وبدا مرتبكا وقد
شاركنا الدهشة هو الآخر، وعاد إلى سلمى التى بدأت تستفيق،
وتركز مع من حولها، وأعاد توقيع الكشف الطبي عليها ثانية،
وقام مرتبكا يستدير بظهره، ويجفف عرقه ويهز رأسه بكل أسى.

_ أنا آسف جدا يا جماعة، الآنسة حامل.

خرج الطبيب منصرفا عنا بسرعة، ليتفادى الحرج، لم يستطع
البقاء لحظة واحدة بعد ما تأكد من حمل سلمى، وعرف أنها

خطيبيتي وليست زوجتي، خرج تاركا خلفه مشهدا صامتا، لأبوين صارا مكلومين ترتسم على ملامحهما الشيوخوخة المفاجأة التي أصابتهما لسماع ذلك الخبر.

فسرعان ما اعتلت التجاعيد وجوههم، وانتشر الحزن بين جفونهم، بل تفرحت الجفون كأنهما يبكيان منذ فترة طويلة من الزمن.

خرج الطبيب ليتركني واقفا على قدميِّ تائها، لا أدري إن كانت رأسي هي من تحمل جسدي أم أنهما أقدامي المرتعشة هي التي تحملني .

أي مصيبة تلك التي ألمت بي في يوم كنت أتوجس خيفة منه منذ الصباح؟ وكأن قلبي يسبقني إلى ذلك الموقف، فزادت نبضاته مبكرا.

نظرت إلى أسرة سلمى فوجدت أبصارهم شاخصة إليَّ بنظرات عتاب قاسية يخالطها شيء من التوسل والانكسار، وكأنهم يتهمونني بخيانة ثقتهم فيَّ ووقوعي في بئر الخطيئة مع ابنتهم التي سعدوا بخطبتي لها. لم أشعر بنفسي وأنا أنظر لوجه خطيبيتي نظرات إتهام واحتقار، وقد فتحت عينيها على ذلك الخبر الأليم، واستفاقت دون أن تنبس ببنت شفة، لكنها تنظر إليَّ نظرات اندهاش وحيرة تتخللها البراءة، نظرات دامعة تنصب عمودية على عيني، في محاولة دفاع صامتة يخرسها الأمر الغريب، الذي لم نكن نحسب له أو نتوقعه، بل لا يخطر على قلب بشر في الدنيا كلها.

لا أدري كيف أحسن التصرف في ذلك الموقف، وأنا الذي أضع الثقة العمياء في سلمى، وأقرأ بين عينيها حروف تكذيب لذلك التشخيص، بل إن عقلها قد طار مثلي، لا تتقبل ما تسمعه، فلو أنها مخطئة فعلا لصرخت تُكذِّب ما تسمع، أو لحاولت التغلب

على الموقف بالصوت العالي حتي تهوّن من حدة الأمر، لتكسب
جولة كتلك الجولات التي تريح بها المذنبات مهلة للعقاب من
والوالدين بسبق التحقيق الأسري بصرخات الدفاع.

قلت لهم أي لا أثق بتشخيص الأطباء الشباب داخل
المستشفيات الحكومية، ولا بد أن نعرضها على الدكتورة ناهد
السعدي طبيبة النساء والتوليد التي نعرفها ونثق في تشخيصها،
وهي أكثر من يقضي في أمر سلمى، حتى نكون على يقين قبل
أن نتبادل النظرات القاسية، والاتهامات الصامتة، فشيطني يوجه
التهمة لسلمى بالخيانة، وأسرّة سلمى تتهمني أنا بسوء الفعل،
والمسكينة لا تستطيع إنكار التهمة عن نفسها، أو حتى إثباتها.

خرجنا جميعاً من المستشفى، وتوجهنا إلى عيادة الدكتورة ناهد
السعدي، وشرحت لها الأمر قبل كل شيء، فقررت إبعادي عن
غرفة الكشف ما دمت خطيباً لها ولست زوجها، ثم استدعتني
للدخول إليها ثانية، فوجدت سلمى تجلس على سرير الكشف
واجمة، وقد تحول لونها للأصفر الفاقع، وأبواها ينظران إلى قدميّ
اللتين تسرعان الخطى ناحية الغرفة، والدكتورة ناهد تنظر إليّ
نظرات ساخطة.

_ إيه الأخبار يا دكتورة ناهد؟ طمّيني.

_ الأخبار كلها بتشير إلى إنك إنسان خاين للأمانة، إنسان وضيع
وعلى غير قدر من المسؤولية تجاه الآخرين.

_ ايه الكلام اللي بتقوليه ده انت يا ست انت؟

_ بقول لك اللي سمعته، وعيب أوي تنكر انك اتسببت في
الجريمة دي.

_ ياريت تركزي يا دكتورة شوية وتشوفي نفسك بتقولي إيه.
_ هتعمل لي فيها شريف، وانت جريمته فاضحاك.
عرفت من كلماتها وحدثها معي، أنها تشك أي أوقعت بسلمى
في الخطيئة، وأنها حامل بالفعل، بل أنها تظن أي أنا المجرم.
نظرت إلى سلمى، ثم عاودت النظر إلى الدكتورة ناهد، وأنا
واجم الفكر.
_ أفهم من كلامك يا دكتورة إن سلمى حامل فعلا؟
_ وتفهم كمان إن سلمى عمرها ما اختلطت بحد، ولا طلعت
هنا ولا هنا، وأتمنى تطلع راجل وتصحح غلطتك.
وهنا انفجرت سلمى، وصرخت بصوت عالٍ لأول مرة منذ
سقوطها على مائدة العشاء مغشيا عليها، تكلمت سلمى وهي
تبكي بحرقه وقد تحشرج صدرها.
_ مستحيل أكون حامل .. مستحيل.. طاب ازاى؟ هكون حامل ازاى؟
_ انتي متأكدي م الي بتقوليه ده يا سلمى؟
_ متأكدة يا علاء، والله متأكدة، مستحيل يا دكتورة، مستحيل،
أرجوكِ قولي كلام غير ده
وقفت الدكتورة ناهد حائرة، وتقدمت ناحية تلفزيون الفحص
تفتحه، فتقدمت إليها رافعا صوتي.
_ دكتورة! بعد إذنك تتأكدي من عذرية سلمى.
_ انت بتقول ايه يا بني آدم انت؟
_ الي سمعته يا دكتورة، أنا عايزك تعلمي لها كشف عذرية.
_ أنا هعمل لها اختبار حمل، وهكشف عليها بالتلفزيون.
_ يا دكتورة أنا المسئول عن الحالة، وبقولك ياريت تعلمي لها
كشف عذرية، أنا متأكد من سلمى كويس جدا، أرجوكِ بلاش

تضغطي على نفسييتها أكثر من كده.

نظرت الدكتورة ناهد إلى سلمى التي هزت رأسها بالإيجاب توافقني الرأي، فوالدها يقفان مسلوبا الإرادة، لا حول لهم ولا قوة يتابعان الأحداث ويتقربان النتائج، فيما مصيبة تنكس رؤوسهم، أو طوق نجاة يسعدهم.

طردتني الطيبة من الغرفة، وأخرجت والد سلمى معي هذه المرة، فلا يجوز له حضور تلك الموقعة، وأبقت على والدتها معها، وقامت بتوقيع كشف العذرية على سلمى التي وصلت لحالة يرثى لها.

دخلت هذه المرة إلى غرفة الكشف، فوجدت وجه سلمى قد توزعت كل إحساسات الدنيا على أجزائه، وأضحى لوحة متعددة الرسومات، فلا تدري إن كان باسم أم شاحبا، أم مندهشا. كان وجه سلمى غريب الملامح، يصعب عليّ قراءة الموقف من خلال نظرة وحيدة ألقبها عليه كعادي، فلم أكن أدري إن كانت تلك الملامح تلقت أخبارا سارة، أم أن المصائب قد ازدادت مصيبة أو مصيبتين بعد توقيع كشف العذرية.

_ طمني يا دكتورة.

_ حاجة غريبة فعلا يا أستاذ علاء!

_ بدون مقدمات يا دكتورة أرجوك، إيه الأخبار.

_ الآنسة سلمى لسة عذراء.

_ الحمد لله رب العالمين، يعني مش حامل؟

_ هي عذراء .. بس للأسف حامل.

وهنا اختفت نظرات الاتهام ، وارتسمت ملامح الدهشة وعدم الرضا ، والخوف من عواقب الموضوع.

_ ازاي عذراء وازاي حامل يا دكتورة؟!

_ ده اللي شايلاه قدامي ومش هعرف أفيدك بأكثر من كده.

_ يا دكتورة قولي كلام يدخل العقل، هو انت كده بتطمنيننا

ولا بتزودي حيرتنا.

نظرت الطبيبة لوالد خطيبي ولأمها الدامعة منذ لحظة

خروجنا من البيت، ثم رفعت بصرها إلى سلمي قائلة:

_ كل اللي أنا متأكدة منه إنها حامل وهي عذراء بس، وتقدر

تعرضها على أي دكتور زميلنا وتتأكد بنفسك من كلامي.

كان الأمر مثيرا للدهشة بالنسبة لي ولأي شخص يسمع كل هذا

الكلام عن تلك الحالة، كيف تكون سلمي حامل وهي لم تزل

عذراء، وأنا لم أشك لحظة واحدة في عذريتها وبراءتها من أي اتهام

وجهته لها نظرات أبويها، أو حتى نظراتي عند الصدمة الأولى.

كيف تكون سلمي حامل؟ ولم نسمع في تاريخ الإنسانية كلها

عن عذراء حملت طفلا سوى السيدة مريم عليها السلام، وكان

حملها معجزة سماوية لتهب للأرض مسيح الهدي عليه السلام

الذي نطق في المههد صبيًا، فلم يكن حمل السيدة مريم أمرا

تم بالصدفة، ولكنه أمرا يخرق به رب السموات والأرض نواميس

الكون، ليرى أهل الأرض عظمته جل في علاه، لعلهم يرشدون.

ذهبنا إلى الدكتور راشد عبد النبي وهو أخصائي النساء

والتوليد المشهود له بالكفاءة في الحي بأكمله، وكان يحب المزح

بالكلمات في تشخيص الحالات، ليمتص الخوف من بعض الحالات

التي تُعَرِّض عليه يوميا.

كانت العيادة ممثلة على آخرها بالسيدات الحوامل من مختلف الأعمار ودرجات الحمل، فمنهن من تحمل الجنين الأول، ومن تحمل الثاني أو الثالث، ومنهن من بلغت من العمر أربعين عاما وتنتظر مولودها السابع، رغم أنها تحمل السادس بين ذراعيها طفلا رضيعا لم تفضمه بعد.

كانت الفرحة تملأ وجوه السيدات ومرافقيهم من أقاربهم، الكل يتبادل الهمسات والضحكات ومداعبة الأطفال، اللذين جعلوا من صالة الانتظار بالعيادة مدينة للملاهي، أو ملعبا لكرة القدم ومنهم من جعلها موقعا لتصوير أحد الأفلام السينمائية التي تعرض ملحمة تاريخية لإحدى المعارك القديمة؟.

وأنا أرى ذرات الهواء التي تبعثر السعادة على وجوه الحاضرين بالعيادة، تأبي أن تطوف حول وجوهنا، لتبدل تجاعيد الشجن التي اعتلت أنوفنا، لملامح سعيدة كهؤلاء الحوامل ومرافقيهم.

كل الحالات التي تنتظر موعد توقيع الكشف الطبي عليها، تنتظر أخبارا سارة لتحديد تلك اللحظة الهامة، التي يسجلوها في ذكرياتهم بحروف السلم الموسيقي، فجميعهم في انتظار ما يجعلهم يتلقون تهنئة كل المحيطين بهم.

أما أنا .. ليت أمني لم تلدني، ليت عيني لم تر الحياة، ليت روحي فارقتني قبل هذا، ليتني أفقد الثقة في أخلاق سلمى، حتي أكون قادرا على التخلي عنها، وأهرب من تلك المشكلة، ليت كل هذا قد تحقق مسبقا، ولكن أمني للأسف قد ولدتني، وعيني رأت الحياة ولم تزل تراها، وروحي ترافقتني في مصيبتني وتختنق من آلام ما ترى عيني، وسلمى هي المخلوقة الوحيدة التي أضع فيها ثقتي العمياء بعد أمني، ولن أتخلي عنها أبدا، ولو خسرت عيني

وروحى وكذلك خسرت الحياة.

أما سلمى .. فعيناها تراقبني، وروحها تحلق بعيدا عن المكان، وعقلها شارد لا أعرف أين وصلت به أفكارها، وقدميها تتحسسان الأرض تناشداها أن تنشق لتبتلعها فتخفيها عن ذلك المشهد الذي لم تتخيل نفسها فيه للحظة واحدة في حياته.

أما والدها.. جالس في مكانه لا يستطيع التحرك، وكأنه مصاب بشلل كلي في شتى أجزاء جسده إلا رأسه التي تتحرك يمنة ويسارا، يرى زبائن العيادة الذين تتعالى ضحكاتهم، تظهر الفرحة على وجوههم، وينظر لسلمى الواجمة التي بدت وكأنها سر تعاسته، ويدقق النظر في وجهي مرة تلي الأخرى، يناشدي صامتا ألا أتخلى عنهم في مصيبتهم..

وأم سلمى.. تبدو وكأنها كتلة سحاب جامدة في كبد السماء، لا تتحرك كما يتحرك السحاب تتساقط منها الأمطار من ثغرتين فيها، أما الأمطار فهي دموعها، وعيونها هي الثغرات التي ذابت معالمها، حتى بدت وكأنها ثقوب في حجر قديم تتفجر منه المياه، لا تحرك ساكنا، ولا تُسَكِن مُتَحَرِّكًا، تنتظر رصاصة الرحمة من الدكتور راشد، إما يطلقها بإثبات الحمل أو نفيه، وكلاهما رحمة من عذاب الانتظار.

سمعنا رنات جرس غرفة الطبيب تستدعي التمرجي المسئول عن تنظيم دخول الحالات لغرفة الكشف، فخرج علينا التمرجي بعد دقيقتين ينادي اسم سلمى.

_ سلمى إبراهيم.

ففزعنا جميعا ننظر ناحية التمرجي نظرات حائرة متسائلة، وكأننا لا نعرف لماذا ينادي اسم سلمى الآن، فقدنا عقولنا حينها،

وانتظرناه يقرأ علينا التقرير، أي تقرير ذلك الذي يقرأه التمرجي؟
لا ندرى .. نحن لم نوقع الكشف حتي يقرأ علينا تقريراً طيباً.
_ يلا يا مدام سلمى دورك في الكشف وصل.

يا إلهي! هل وصلنا إلى هذا الدرجة من شرود العقل، حتى
نتعجب من نداء التمرجي على سلمى، ونحن ننتظر ذلك النداء
حتى ندخل غرفة الكشف؟ يا لها من صدمة أطاحت بأسماعنا
وأبصارنا وعقولنا وقلوبنا، وبينها وبين الإطاحة بأرواحنا خطوات
قليلة.

دخلنا على الدكتور راشد، واستلقت سلمى على سرير الكشف
دون أن تتفوه بكلمة، وجلس والداها بجوارها يراقبان حوارى مع
الدكتور راشد.

_ باختصار شديد يا دكتور، دي سلمى خطيبتى، تعبت شوية
ورحنا المستشفى والدكتور الشاب قال لنا إنها حامل، واحنا لسة
مخطوبين، جرينا بيها على الدكتورة ناهد السعدي، قالت لنا إنها
فعلاً حامل، وكمان عذراء.

_ حامل وكمان عذراء! ازاي الكلام ده؟

_ ده نفس السؤال اللي أنا سألته لها، ونتمنى حضرتك تريح
قلوبنا لأننا خلاص فقدنا عقولنا وأعصابنا وماشين بدون وعي.
_ متخافش، إن شاء الله خير.

قام الدكتور راشد ناحية سلمى يوقع عليها الكشف الطبي،
وتأهبت للخروج من الغرفة إلا أنني فوجئت بالدكتور راشد يسدل
ستارا على مشهد الكشف، ليجعله حاجزاً دون نظراتي إليهم ولكن
والد سلمى هذه المرة ظل واقفاً بينهم لم يستطع التحرك بعيداً
عنهم.

ما هي إلا دقائق حتى رفع الطبيب الستار وخرج واجماً مندهشاً، قد أصابه ما أصابنا، وهو يعلق سماعته علي رقبتة، ويطرق بآخرها فمه، كالتلميذ الصغير يضع القلم الرصاص بين شفثيه لحظة شروده.

_ انت متأكد إن الدكتورة ناهد كشفت علي عذريتها؟

_ أيوة يا دكتور، وأكدت لنا إنها لسة عذراء.

_ والحمل ده تم ازاي؟

_ صلي ع النبي يا دكتور، احنا متأكدين من موضوع العذرية وشاكين في وجود حمل أصلاً.

جلس الطبيب علي مكتبه، ووضع يديه متشابكتي الأصابع تحت جبهته، وحرَّك رأسه عدة مرات ثم رفعها، ونظر فينا وهو يضم شفثيه، كمن يغلقهما ليحجز أكبر عدد من الكلمات خلفهما، فيتفوه بهم جملة واحدة دون تردد أو تفكير في تنسيق لاحق للكلمات.

_ هو انتوا مخطوبين من إمتي؟

_ لينا سنتين بالظبط.

_ عن حب؟ ولا صالونات؟

_ اللهم طولك يا روح .. عن حب.

_ لما بتتقابلوا بيكون في شغف ولهفة وأحضان ولا عادي؟

أصابنتي حالة من الغضب كتمتها بداخلي، وكظمت غيظي، حتي لا أمسك رقبة الدكتور راشد واكرها عقاباً له على أسئلته التي لا تتصل بالأمر الذي يؤرقنا، فما كنت لأقوم بأي عمل يجعل سلمي تفقد أعصابها، وهي التي تمتص سكونها من سكوني، وهدوءها من تريثي، حتى في أعظم مصيبة تعيشها.

أراها مطمئنة قليلا لوقوفي بجوارها ثابتا صلبا، ولو أنني فقدت السيطرة على نفسي، لانفجرت سلمى في البكاء، لتندب حظها، وتشق جيوبها على ما وصلت إليه، فسكوني أمامها بمثابة المادة المخدرة التي تسكنها، وتهون الأمر عليها.

_ أرجوك يا دكتور، هات من الآخر وقول لي تشخيصك علشان نرتاح.
_ مبدئيا هي حامل فعلا، ودي حالة أول مرة تعدي عليا في حياتي، وكمان في زميل وزميلة قبلي قالوا نفس الكلام، يعني كده الموضوع أصبح مؤكد، ومؤكد جدا كمان.

_ حامل! ولسة عذراء! طاب ازاي ده؟

وقف الطبيب وتحرك في الغرفة خطوات دون أن يتكلم، وكأنه يستغيث بذاكرته العلمية عله يجد تفسيراً علمياً واحداً لتلك الحالة، التي تمر عليه لتضيف قَطرات لبحر خبراته، وتطيح بأحلامنا في تجرع قطرة واحدة من السعادة، حتى انفجرت أساريره وابتسم، وكأن قلبه يصرخ قائلاً وجدتها وجدتها، وهاج ثائرا يضح محاضرتة على أسماعنا في محاولة لإقناعنا بما قد توصل إليه وبدأ يتحدث الفصحي كأنه يقدم برنامجاً علمياً قائلاً:

_ قد تكون تلك الحالة من حالات الحمل، نتجت عن تلاقيكم بعد شوق ولهفة، وقد تقضون الساعات تتبادلون النظرات والهمسات واللفتات، دون حاجز بينكم، ويحمل كل واحد منكم في عقله ما يحمله الزوج لزوجته، وتحمله الزوجة لزوجها، وأظن أنه قد حدث بينكم أمر ما جع.....

قاطعته قائلاً:

_ ايه يا دكتور اللي بتقوله ده، تحليلك مش صحيح خالص واللي بتحكي عليه ده محصلش

_ انت حر، ده اللي عندي، ووقت الكشف بتاعكم خلص.

_ شاكرين الأفضال يا دكتور، يلا يا سلمى، يلا يا جماعة.

قامت سلمى من مكانها لا حول لها ولا قوة، تسندها أمها المكلومة، وجرجر والدها قدميه ماشيا خلفهم خارج غرفة الكشف، فقد تثاقلت أرجله عن المشي، لا يدري المسكين أي مصيبة تنتظره بعد الوصول إلي البيت ومقابلة ابنه خالد، يفكر في أقاربه، ماذا يقول لهم؟ أي حمل ذلك الذي تحمله ابنته وهي لم تزل مخطوبة؟ هل يصدق الجيران أنها عذراء؟ هل يقتنع الجيران وجيران الجيران أن العذراء قد تتعرض للحمل دون أن يمسه أحد؟ هل ينتظر الناس رأي العلم في تلك الحالة؟ أي مصيبة تلك التي تنتظر أبو خالد بل تنتظرنا جميعنا؟.

رجعنا إلى منزل أسرة سلمى، فوجدنا خالد ينتظرنا بالمنزل كما توقعنا، فوقع عليه بصري، فزعت من هيئته، رأيت في عينيه شرًا يتقد، وكأنه يعرف ما أصاب سلمى، وما سمعناه من تشخيصات الأطباء.

وقف خالد وتقدم إلى سلمى وهو ينظر إليها حانقا، وأمسك يدها يسندها مع أمه، فأجلسها على الكنبه المواجهة لباب دخول المنزل، وتقدم ناحية الباب وأغلقه، جلست أم سلمى بجوارها على الكنبه، وتقدم أبو خالد ناحية السلم وجلس واضعا يديه على رأسه، يقبض عليها خشية أن تنفجر من هول ما تراكم عليها من أحداث.

تقدم خالد ناحيتي وأمسك بيدي وأجلسني على الكنبه المقابلة لغرفة الضيوف الداخلية، وهو يقبض على فمه.

_ إيه اللي حصل بالظبط يا أستاذ علاء؟.
فوجئت بسؤاله وأنا مرتبك، لم أكن أتوقع أن علاء يعرف شيئاً
عن ذلك الخطب الجسيم الذي طرأ علينا، فلم يكن معنا أحد،
خرجنا معا وعدنا معا.

_ مش فاهم يا خالد، تقصد ايه؟

_ يعني إيه سلمى حامل يا أستاذ علاء؟ ازاي الكلام ده حصل؟
أصعقتني تلك الجملة، فتلعثمت، ووجدتني أسعل، وسلمى
ترفع رأسها بسرعة، ناظرة إلى خالد كمن أفزعها صوت قطار مر
فجأة بجوار نائم دون تنبيه مسبق، وأبو خالد الذي انتصب واقفا
كأن قوة لا إرادية فرضت نفسها على جسده جعلته يهب قائماً
كالأعمدة المسلحة، جسد بلا مفاصل ولا غضاريف، ووالدة سلمى
في وجومها تراقب الموقف منذ أول وهلة.

_ وانت عرفت ازاي الكلام ده؟

_ رد عليا يا أستاذ علاء، ازاي سلمى حامل أرجوك؟

_ ما انت تقول لي مين اللي قالك علشان أفهم اللي وصل لك
ايه يا خالد.

_ صابرين أخت مراني كانت في المستشفى مع واحدة جارتها،
ولما شافتكم داخلين أوضة الكشف، قعدت مستنياكم برة، علشان
تعمل الواجب ، وتقول لكم ألف سلامة عليها، وسمعت الدكتور
هو وبيقول لكم إن سلمى حامل، وأنا عايز أفهم ايه الحوار ده
بالظبط.

_ لا حول ولا قوة الا بالله العلي العظيم، ولحقت جات تنشر
الخبر، إيه الناس اللي متنشقة على خبر وما بتصدق تسمعه
علشان تضيع دي.

_ أستاذ علاء! أنا على أعصابي الله يبارك فيك، يا ريت تفهمني الموضوع بالظبط.

لم أجد مفرا من أن أحكي لخالد عن زيارتنا للدكتورة ناهد السعيد، و من بعدها الدكتور راشد، الذين أخبرانا أن سلمى لم تزل عذراء، بالرغم من أنها حامل، ولا وقت الآن للعتاب واللوم والقاء الاتهامات لي ولسلمى، بأننا كنا فريسة سهلة للشيطان في أي وقت، ولا مجال للشك في أطراف تثق في بعضها البعض. انفجرت سلمى بالبكاء وأصدرت نحيبا وهي تصرخ، تندب حظها، تعاتب القدر.

_ إيه اللي بيحصل ده يا رب؟ إيه اللي أنا وصلت له ده؟ هموت يا ناس، هموت، مستحيل، لا لا لا لا، مستحيل أتخط في الموقف ده أبدا.

أسرعت ناحيتها وأمسكت يديها، وأوقفتها ونظرت في عينيها، وأنا أتحسس كفة يدها أمام أهلها

_ بس يا سلمى متعمليش في نفسك كده، أنا جنبك، مش هسيبك، أنا واثق فيكي أكثر من أهلك ومش هسيبك، إياك تعملي في نفسك كده، اياك تخلي الحزن والخوف يكون لهم مكان في قلبك انتي فاهمة؟ أنا جنبك يا سلمى، انتي خطيبتني، وهتكوني مراقي، حامل مش حامل مراقي.

_ هو ايه اللي بيحصل لي ده يا علاء؟ ليه أنا بالذات اللي أبقى لبانة في بوء صابرين وغيرها صابرين هتفضح الدنيا يا علاء. _ وأنا هدعي الدنيا دي كلها تشهد على فرحنا يا سلمى، إياك تزعلي نفسك كده.

حاولت سلمى أن تتماسك، وتوقف نحيبها، وقبضت على يديّ
بقوة وهمست متوسلة

_ أرجوك يا علاء إوعى تتخلي عني

_ أتخلي عنك ازاي يا سلمى؟ ده أنا الدنيا ضلمت في عيني
لما غمضتي عينك، والحياة دلوقتي سودة يا سلمى، سودة أوي،
مش علشان اللي بيحصل لنا ده، الحياة سودة علشان إنتِ بتبكي
أرجوكِ يا سلمى متبكيش، علشان خاطري، والله ما هسيبك، مش
هسيبك يا سلمى.

_ الله يبارك فيك يا علاء يا ولدي، راجل يا ولدي ومن ضر
راجل.

_ مش ده المهم يا والدي دلوقتي، المهم ازاي نوقف كلام الناس.

_ فين الناس اللي سمعت، محدش يعرف غير أخت مراتك،
وهي وضميرها بقى.

_ هي لو عندها ضمير يا أستاذ علاء كانت جات حكّت لي، يا
ترى حكّت لمين غيري؟

_ أنا هحجز لكم عند أستاذ دكتور في طب النساء والتوليد،
وهنروح له، وبعد كده هعمل المستحيل علشان اتجوز سلمى،
سواء قال حامل أو مش حامل أو أي تشخيص، سلمى دي مراتي
من دلوقتي يا جماعة.

مضى النصف الأول من الليل علينا داخل بيت أسرة سلمى،
وأنا في محاولاتٍ للتخفيف عنها من ويلات ما تلاقى، و أن الأوان
أن أرحل، لأتركهم يهجعون قليلا، يركنون إلى مضاجعهم فيستريحوا
قسطا من الليل، إن استجاب النوم لهم، ولبي دعوتهم للحضور،
مطبقا على جفونهم ومريحا لفكرهم، ليسحبهم من مرارة الواقع،

إلى فضاء الخيال المتسع، الذي يهرب إليه البشر في يقظتهم، ويجذب بعض النائمين إليه، دون أن يختاروا طريقهم حين يسبحون فيه، فمنهم من يطوف في ملكوت السعادة فترة قليلة من الزمن، ومنهم من تلاحقه نوائبه القابعة في عقله الباطن لتصبغ أحلامه بصبغة الغصة والمرار.

عدت إلى بيتنا، فوجدت والدي يقظا ينتظرني، وكأنه قد علم هو الآخر بتلك المصيبة، ولكني لا أظن ذلك، فليس هناك أي علاقة تربطه بصابرين أخت زوجة خالد التي أبلغت أهلها خبر الحمل.

_ مساء الخير يا بابا.

_ اتأخرت ليه كده يا علاء يا بني؟

_ أبدا يا بابا، بس أخذني الوقت مع سلمى.

_ وايه موضوع الحمل بتاعها ده؟

يا للدهشة! ... كيف عرف والدي أن سلمى حامل؟

يا إلهي! من أين له بتلك الأخبار؟

لم أستطع الرد، ولكنني رفعت بصري إليه، وحدقت فيه النظر لأقرأ ملامحه جيدا قبل أن أجيبه، لأرى ما الذي يدور في عقله من خلال عينيه، فوجدت عينيه تتهمني بارتكاب فعل فاحش، وتتهم سلمى بالخطيئة.

_ وحضرتك عرفت ازاي يا بابا؟!

_ ايه هو اللي عرفت ازاي؟ دي الحتة كلها عارفة.

_ والحتة عرفت ازاي؟! هي حارتنا والحواري اللي جنبنا يعرفوا

صابرين منين؟!

_ أنا سمعت الخبر في الصيدلية، كان الواد حمادة الحلاق يبسال الدكتور ازاي واحدة تحمل وهي لسة بنت بنوت، وراح قال له انك كنت في المستشفى، وخطيبتك طلعت حامل، وإنك رحلت للدكتورة ناهد وقالت لك إنها حامل ولسة عذراء، وإن الدكتور راشد قال لك نفس الكلام، فهمني يا ولدي ايه اللي حصل.

يا إلهي!

ما الذي يحدث؟ أين أعيش؟ بل أي أناس هؤلاء الذين أعيش بينهم في منطقة واحدة؟ كيف تناقلوا أخباري وتحركاتي بتلك السرعة؟ بل كيف عرفوا تشخيصات تلك الأطباء؟.

شعرت أن الدنيا كلها تدور بي، وأنا أقف في المنتصف لا أستطيع تحديد أي مركز من مراكزها، لا أعرف ما سر ذلك الضعف المفاجئ الذي أصابني، لقد كنت صلبا قويا منذ أقل من نصف ساعة، ما الذي هزني هكذا، ما الذي أضعفني؟.

لا بد أنني شعرت بالخوف من تداول الأحاديث على السنة الناس، عن سلمى وتوجيه الاتهامات لها ولي بالباطل، وهذا أمر يزعجني، ولكنني أكاد أصعق من هول ما أسمع، كيف طاف الخبر كل أرجاء المنطقة بتلك السرعة؟ بل كيف عرف الناس تشخيصات الدكتورة ناهد والدكتور راشد؟ ولم يكن معنا أحد داخل الغرف المغلقة؟ كيف حدث كل ذلك؟.

_ جاوبني يا ابني حصل ايه بس؟

_ جاوبني انت يا بابا الأول، قول لي الواد حمادة الحلاق عرف

ازاي، وشاف صابرين فين؟

_ حمادة الحلاق سمع زبون عنده كان في عيادة الدكتور راشد، ودخل بعدك على أوضة الكشف، وسمع الدكتور راشد بيكلم

الدكتورة ناهد في التليفون، يقول لها انت متأكدة ان البنت
المخطوبة الي كانت عندك دي لسة عذراء، وقال لها كمان إنها
لسة خارجة من عنده هي وأمها وأبوها وخطيبها حالا، وهو
مش عارف يركز في أي حاجة، والزبون ده يعرفك مين ومين،
ويعرف خالد أخو سلمى كمان، وبيقول انه مش عارف يسأل
أخوها خالد عن الموضوع، خايف يفهمه غلط.

— هههههههه! لا حول ولا قوة إلا بالله، بالسرعة دي الخبر ينتشر
بكل تفاصيله، لحد ما يوصل عند الحلاق، ويدخل الصيدلية،
ويوصل بيتنا، ويروح بيت نسايبى من مصدر تاني خالص احنا
فين؟ ولا احنا مين؟ ولا ايه الي بيحصل ده؟

ضحكات هيسترية أطلقتها بعد منتصف الليل، وأنا أقف بين
يدي والدي الذي يود معرفة الأمر بكل كواليسه، والدي الذي
يتمنى أن يراني في بيتي مع زوجتي سعيدا هانئا، خاليا من كل
مشاكل الحياة..

_ هو انت غلطت مع سلمى يا علاء؟

_ وانت تعرف عني كده يا بابا؟

_ طاب سلمى يا علاء ممكن ..

_ أرجوك يا بابا بلاش تقولها، سلمى عمرها ما تغلط، والموضوع
سهل وبسيط، وأنا هعرضها على استشاري نساء وتوليد، يشوف
لنا تفسير علمي للموضوع ده، بس الناس زي عادتها استعجلت في
نشر الخبر، ويا ترى هيضيفوا عليه إيه من عندهم لزوم الحكمة،
حسبي الله ونعم الوكيل، حسبي الله ونعم الوكيل.

تركت والدي ودخلت غرفتي، لا أحمل في رأسي وصدري همًا
سوي تلك الأنباء التي يستعد الناس لتناقلها صباح الغد، ولا أخشى

سوى تلك الإضافات التي يبدعوا في تأليفها لتزداد الموضوعات إثارة وتشويقا، أعلم تماما أن ماراثون الحكايات سينطلق صباحا في منطقتنا كلها، ليرى جمهور المتابعون من هو الأفضل سردا لحديث الموسم، وموضوعه حمل سلمى خطيبتي.

أسندت ظهري على وسادتي، ولكني لم أسند عقلي، لا أدري إن كان النبض في قلبي أم في أصابع يدي، بل هو في رأسي، لكنه في قدمي، لا أدري إن كنت أتنفس من أمعائي، أم أن التنفس في سلسلة ظهري، أغمضت عيني فوجدتها تأبى أن تغمض، وكأنها هي المتحكمة في مركز المخ العاجز عن أمرها بالخلود إلى النوم. الغرفة حولي مظلمة، فهل أنا من أطفأت النور بأصابع يدي؟ أم أن التيار الكهرباء قد انقطع أم أصابني العمى ولن أرى شيئا بعد تلك اللحظات.

قمت ناحية لوحة مفاتيح الإضاءة لأتأكد منه، فضغطته فازدادت الغرفة ظلاما، فعاودت ضغطه فعاد الظلام أخف حدة، فعلمت حينها أنني لا زلت أبصر، وأن الغرفة مضاءة، ولكن ظلاما حالكا يحتل رأسي، يغطي على إضاءة الغرفة، فلم أعد أرى شيئا على غير العادة.

نمت على جنبي الأيمن، ثم الأيسر، عاودت الجلوس ثانية، ولكني سرعان ما أرخيت ظهري ومددت قدمي على طول الفراش، ووضعت يداي علي صدري، اليمنى تعلقو اليسرى، وكأنني ميت ينتظر أربعة يحملونه على النعش ليوارى الثرى إلى مثواه الأخير.

نعم هي تلك الحقيقة، لم يسترح جسدي إلا على ذلك الوضع في نومي، وجدت في وضع المبيت راحة لي، وكأنني أطلبه لأفراً من مصيبتني إلى ذلك العالم الخالي من المشاكل، أو لأنه هو المفرد الآمن من ويلات تلك المشكلة التي بدت خيوطها أكثر تعقيدا وتشابكا، حتى وصل حلها إلى

درجة المستحيل.

استشعرت الراحة في وضعي نائما، وكأني أنادي ملك الموت الآن ليقبض روحي، ليخلصني من تراكمات رأسي، وثقل صدري، وسواد عيني، وأجراس الخطر التي تدق في أذني، طلبت ملك الموت وأنا أخبره أنني مستعد الآن، متخذا الوضع الذي يحب أن يراني عليه، وأنا أحب أن أراه الآن.

ولكن!

إذا متُّ الآن فمن ينقذ سلمى من مصيبتها؟ من يطفئ لها ذلك الشر الذي يتقد في أعين الناس المحيطة بها؟ من يربت على كتفيها برفق ليسكب عليها جرعات حنان ترطب أماكن الأشواك التي أطلقتها السنة المتكلمين عنها؟ لو أنا متُّ الآن فمن يكن لها درعا يصد عنها سهام النمامين، ورماح الهمازين واللامازين؟.

لا يا ملك الموت، قد تراجع في رأيي، أرجوك لا تقبضني الآن، لن أهرب من مصيبتني، لن أترك سلمى وحدها تعاني نظرات عاهري الفكر في مجتمعاتنا.

نمت ليلتي حتي الصباح، وأنا أفكر في سلمى، كيف تقضي ليلتها؟ هل تمت الموت مثلي؟ أم أنها ماتت من طعنات وساوسها؟ هل استطاعت الغوص في الأحلام؟ أم أن تيار يقظتها جرفها إلى دوامات الأرق، فتهاوت في نفس الحلم الذي مزج اليقظة بالمنام، فتبدلت حولها تضاريس الأرض، فرأت البحار تعلو الجبال، والصخور في الأرض المستوية، تقذفها الأمواج في جو السماء، وتدوس السحاب على الأرض، والرياح العاتية تتخذ جانبا في الطرقات، تضع يدها أسفل أذقانها لتشاهد سلمى التائهة في جنبات الحياة.

ما إن دقت الساعة السابعة صباحا، حتى هرعت إلى الشارع قاصدا بيت سلمى، لتفتح عينيها فتزاني أمامها، لتزوي الطمأنينة برؤية ابتسامتي في وجهها، ولتقم صلبها بلقيمات تغمسها من درجات صوتي، فتستقبل يومها دون خوف من هم يصيبها، أو نائبة أخرى تقضي على ما تبقى في جسدها من خلايا عصبية تساعد على معايشة طبيعة الحياة.

كنت أظن أي لها الآن سفينة تحملها على ظهرها، فتقلها من أمواج الفضاء إلى شواطئ برية، وربانا يستدعي الرياح من سكونها، لتدعمها ببعض طبقات الهواء، وراكبا يشعرها بأن التضاريس تعود إلى سابق عهدها، فتسبح السحب في السماء، وتجري البحار في شقوق الأرض، والجبال الرواسي تزن الأرض كما عهدتها سلمى من قبل.

ولكن في طريقي إليها وجدت نفسي غارقا في مستنقعات قذرة بين نظرات الناس، الكل يراقبني، يتابعني.

في كل خطوة أخطوها في طريقي أسمع همسا، وأري غمزا، وأستشعر نهممة، وأتلقى وابلا من سهام الاتهامات يطعنني في ظهري، لكني لا أعرف ماذا يقول هؤلاء الغوغائيون عني. أصبحت مجرما في نظر المحيطين بي، وأضحت سلمى ساقطة، أطلقوا الأكاذيب فصدقوها، فحاكوها وارتدوها، فأعجبهم حياكتها فطرزوها، فجذب انتباههم تطريزها فزادوها أشكالا ورسوما تزيدها تشويقا وإثارة، فأضحت لحومنا أنا والمسكينة مباحة لكل تلك الكلاب الضالة لتنهش فيها، دون أن تفكر للحظة واحدة في حيثيات المصيبة التي ألمت بنا.

أسرعت الخطى إلى سلمى، لم تطق قدماي صبرا على المسير،
فتمنيت لو أَدفع الأرض تحتي فأطير إليها هاربا من ذلك العالم،
لعلي أجد في قربها راحة وسكينة، وأستمد من ضعفها قوتي فكلما
رأيتها خائفة، تصنعت القوة أمامها لأبث فيها الطمأنينة، فكم
مسحت عنها الخوف بأمان كفوفي، ونفخت فيها من قوتي ليختفي
الضعف من عينيها فلا يعود إلا في غيابي.

طرت إلى سلمى، قبل أن ترى مثلما رأَت عيني من السهام القذرة
المصوبة تجاهي فأصابتنني في نفسي، فلم تهمني نفسي، طرت إليها
لألقي بجسدي أمام نفسي التي هناك، فأصابتها فقط تميتني.
وقفت أمام المنزل لأطرق الباب عليهم، فسمعت أصواتا عالية
تبادل الاتهامات بالداخل عرفت أنها مشادة كلامية عائلية، بل
كنت على يقين أنها محاكمة قاسية يديرها قضاة العائلة دعاة
الشرف، ليدفعوا عن أنفسهم العار، وإن كانت الوسيلة هي قتل
سلمى دون التأكد من براءتها.

اقتحمت المنزل دون انتظار من يفتح لي الباب، فكيف أنتظر
بعض الثواني، وأنا أعلم أن المسكينة تتحمل وحدها أسواط
الجلادين بالداخل.

كان المنزل عامرا برجال وشباب العائلة، يقفون في مختلف أركان
الصالة، عيونهم حمراء كقطرات دماء حديثة النزيف على طريق
مروري في وسط النهار، والشمس في كبد السماء تنزل عليها أشعتها
عمودية في حر يوليو.

وجدت الوجوه من مختلف الفئات العمرية، قد جعلت من
أنفسها قضاةً وجلادين في آن واحد بل أن المتهمين في تلك القضية
أسرة بأكملها، فالمتهم الأصلي هي سلمى التي تجلس على الكنبه

المقابلة لباب الدخول إلى المنزل، وقد اختفت ملامح وجهها، فقد انجرفت تلك الملامح أمام تيار الدموع المندفع من عينيها، وقد خرت قواها من هول ما تلاقي.

و المتهم الثاني وهو المحرض لتلك الجريمة وهو والد سلمى، ذلك الرجل الذي ارتدى بدلة المحكوم عليه بالسجن المشدد، حكما نهائيا لا طعن عليه ولا نقض فيه، فقد جلس على السلم يندب حظه، يراقب بعينه تلك الوجوه العابسة، التي تشابهت، اتخذت تجاعيدها شكل قرون الشيطان العالقة في الأذهان.

حتى الأم المكلومة التي جرح الخطب قلبها، وأطفأ نور عينيها، وأثقل الهم صدرها، هي الأخرى متهمة في تلك القضية التي لم يثبت فيها دليل إدانة واحد، و ما هي إلا تشخيصات أولية لممارس عام وطبيبة أخصائية، وطبيب آخر لم يحصل على درجة الماجستير في الطب رغم قِدم تخرجه في كلية الطب.

كنت أظن أن خالد متهما معهم في نفس القضية، ولكنهم رأوا فيه قوة جسمانية، وحيوية شاب مفتول العضلات، فقرروا في حركاتهم أن يجعلوه قاضيا وجلادا معهم، ليستفيدوا بقوته ويتجنبوا مصارعتة، فمجتمعاتنا لا تحاكم سوى الضعفاء، والثكالي، والمغلوبين على أمرهم.

مجتمعاتنا لا تفتعل الصدام مع الأقوياء وإن أذنبوا، وجلسات المحاكمات العرفية لا تُعقد إلا للنيل من ذوي الظهر المكشوف، والجذور العائلية المقطوعة.

المتهمون في عالمنا دائما يحملون نفس الصورة، صورة المرأة التي أكل عليها الزمان وشرب، فلانت عظامها، وخرت قواها، فلا ولد يرفع عنها، ولا زوج يحميها، ولا أخ يقف حاجزا دون أن تكشف عراها.

هالني ذلك الأمر لحظة دخولي إلى صالة المنزل، فأزعجني وجه سلمى الذي عهدته دائماً نضراً، أستقي منه قطرات الندى التي يبتل لها ريقى كلما وقعت عليه عيني، رأيتة شاحبا وكأنها ترتدي قناع أكبر مسنة في تاريخ البشرية، ذلك القناع الذي قد يجده الأثريون في اكتشافاتهم الحديثة بالمقابر الفرعونية أو ما يماثلها من حضارات العالم القديم.

توقفت قليلاً لأسمع ما يقوله عمها رأفت ذو الخمسين عاماً، الذي يصرخ في وجهها.

_ أنتِ حطيتي راسنا في الطين، مش عارفين نرفع عيننا في الناس، الله يخرب بيتك، وبيت أبوك وبيت أمك اللي مش عارفين يربوك، إنت العيش فيكي حرام، الله يخرب بيتك، الله يخرب بيتك.

رأيتة يتقدم ناحيتها يود صفعها على وجهها بكفة يده، فاندفعت ناحيته، ودفعته بقوة بعيداً عنها وأدرت ظهري لسلمى، ونظرت فيهم جميعاً بوجه غاضب يتقد شراً أكثر من شرهم، بل إني ظننت أن شظايا عيني تفر مني، فتتطاير على وجوههم تحرقهم.

_ انتوا مش بني آدمين، مستحيل تكونوا بني آدمين، وانت مستحيل تكون عمها، ولا انت يا خالد أخوها، انتوا ايه، مش بتحسوا، جاينين بربطة المعلم تنصبوا المحاكمة هنا، وتقطعوا الشوية اللي فاضلين في جسمهم، ايه تختلفوا عن الناس اللي برة اللي انتوا مش عارفين ترفعوا عينكم فيهم، امتى هتتعلموا تتعاملوا مع المصايب.

_ انت ولد مش محترم، وأكيد انت سبب كل البلاوي دي، وإلا مش هتدافع عنها كده.

_ ياريت تحاسب على كلامك يا عم رأفت، لاحظ إنك راجل كبير، وأنا أقسم بالله ما شايف قدامي، يعني ممكن أقتل أي حد دلوقتتي، وخلاصة الموضوع، اللي شايف نفسه قريب سلمى وأبوها، يفكر معنا في حل للمشكلة دي، واللي شايف نفسه قاضي، يا ريت يورينا عرض أكتافه ويمشي من هنا، لان القاضي اللي علينا هو ربنا وحده.

_ وانت بتتكلم بصفتك ايه ان شاء الله يا علاء أفندي، دي بنت أخويا وده بيت أخويا، والعار ده عاري، يعني يمسنى أنا ويمس عيالي.

_ أنا بتكلم بصفتي خطيبها، وكلها كام يوم و هتكون مراقي، لإني هتجوزها.

_ هتتجوزها وهي حامل؟

_ هتجوزها على أي وضع، ومش هسمح لبشر يجيب سيرتها بكلمة، لأني واثق فيها وفي أخلاقها، العيب بئى ع اللي مش واثق في بنت أخوه، وعامل فيها رب البيت.

التفتت إلى سلمى وأمسكت يدها وأوقفتها أمامهم، وأخرجت المناديل الورقية من جيبى، وجففت لها دموعها، ورفعته رأسها ونظرت في عينيها.

_ قلت لك متخافيش من أي بشر طول ما أنا جنبك، كفاية بكا، ارحمي نفسك شوية.

تركت يدها وتحركت خطوات في منتصف الصالة ناحية أبو سلمى وساعدته على الوقوف.

_ النهاردة هتصل بالدكتور هاني استشاري النساء والتوليد،
وهحدد معاه ميعاد للكشف وهناخد سلمى ونروح له يا أبو
خالد، وأيا كان تشخيصه، هنرجع نحدد ميعاد الفرح، ونقطع كل
لسان اتكلم على سلمى بكلمة.

_ الله يبارك فيك يا ولدي، إلهي يستر عرضك، إلهي ينجيك،
روح يا ولدي إلهي ينور بصيرتك.

_ ربنا يبارك لنا في عمرك يا أبو خالد، ويبعد عنك ولاد الحرام.

وقعت عيني في عين رأفت عم سلمى، فوجدته حانقا، وكأنه لا
يتمنى أن يخرج دون استكمال المحاكمة، رأيته يبحث عن مخرج
من ذلك الموقف الذي وضع فيه أمام أقاربه، فلا حاجة لإتمام
المحاكمة وقد اتفقت مع والدها على إتمام الزواج بها.

ما كل هذا الحقد الذي يملأ قلوب الناس؟ فمنذ دقائق كان
غاضبا على أخيه وابنة أخيه، بحجة أنهم جلبوا له العار ولأولاده،
كان رافعا سوطه يجلداهم بقوة، كان يقاضيهم وكأنه قاضي القضاة،
وقد تحرى فأثبت التهمة عليهم، فتحول غضبه إلى غضب أشد
حينما خففت عنهم حدة مصيبتهم بوعدتي لهم بزواجي بها.

أليس من العقل أن يفرح عمها رأفت بزواجها؟ ألن يحو زواجي
بسلمى آثار تلك الفاجعة؟ لكن حقيقة العصابة قد انكشفت،
ونواياهم قد تعرت، هم ثاروا بدعوى الغيرة على الشرف. ولكنهم
لم يتحروا اليقين قبل توجيههم تلك الاتهامات لابنتهم العذراء،
وما إن أطفأت ثورتهم بكلماتي لها أمامهم، ووعدتي لأبيها، رأوا في
أنفسهم حالة من الخذلان، فلم يكتمل ما أعدوا له.

انصرفوا تباعا وتركوا المنزل، يللمون أذيالهم، ليتهم ذهبوا
سعداء باقتراحي لحل المشكلة ولكنهم انصرفوا تعساء، رأيت

التعاسة في وجه كبيرهم رأفت عم سلمى، وإن كان الشباب قد أبدوا سرورا بهذا الاقتراح ووجدوا فيه شيئا من النجاة، لكن ضعفهم أمام قائدهم أجبرهم على إخفاء سرورهم، ولو أنهم ابتسموا في وجه سلمى وهنئوها، لأزالوا عنها كل ما تحمله من عناء.

تركت سلمى وأهلها بعد أن نفخت فيهم شيئا من القوة والصبر ليستعينوا بهم على قضاء يومهم حتى موعد زيارتي لهم ليلا.

هاتفت أصدقائي هشام وزين ومروان، واتفقت معهم أن نتقابل عند مركز زين لأجهزة الكمبيوتر، حتى أفضي إليهم بما أعانيه، ولأسمع منهم ما يقال عني وعن سلمى في منطقتنا والمناطق المحيطة بنا.

قضيت اليوم بأكمله خارج البيت حتى فجر اليوم التالي، وعدت إلى غرفتي منهك القوي، أحاول النوم، ولكنه لم يخضع لمحاولاتي وتوسلاتي تلك المرة، فقد استعدت بذاكرتي كل ما دار بي منذ خروجي صباحا حتى لحظة احتضان رأسي لوسادتي. بدأت أحي نفسي ما لاقيته، كأنها كانت تنتظرني هنا على فراشي، وتود لو أن أسرد لها كل ما حدث في يومي.

يا له من يوم، تكشف لي فيه عرى هذا المجتمع، وتأكدت من عهره الفكري الذي يلاحق كل المحيطين به، صدمتني أخبار الناس وأساليب تناولهم للواقعة كما عرفتھا من هشام وزين ومروان، أصدقائي الذين خرجت بهم من الحياة باقتناء فائق، فوجدت فيهم السند في تلك اللحظات الصعبة من حياتي، فأيدوني

في موقفني بحماية سلمى من الناس.
أخبرني هشام أنه سمع بالموضوع في سيارة الأجرة التي ركبها،
قاصدا عمله قبل أن أتصل به بساعة واحدة.
ما إن تحركت بهم السيارة، حتى صاح أحدهم يحيكي أن الدنيا
تريهم كل يوم ما يثير دهشتهم وأن البنات لم تعد تحفظ سمعة
أسرهم، فسأله أحد الناس عن ماذا يحيكي، فقال له أن سلمى
أخت خالد صديقه، حامل في شهرها الرابع، و أن خطيبها قد فسخ
خطوبته بها وتركها.

فردت عليه إحدى السيدات لتضيف إليه أن خطيبها علاء
يتعاطى المخدرات، وهو من تسبب في حملها.
ليضيف لهم آخر أن البنت تعرف أكثر من شاب، وأمها على
علم بذلك ولكنها لا تمنعها من الخروج في أي وقت، وتخفي عن
أبيها كل ذلك.

يا لفظاعة ما أسمع، في ساعات الليل قد اخترع الناس ألف
قصة وقصة عن سلمى وعني، ما هذا البلاء الذي أصاب المجتمع؟
جعلوا من سلمى فتاة سيئة السمعة، لمجرد انتشار تشخيص طبي
حار في توصيفه المتخصصون، ما تلك المسرحيات التي يحيكونها،
كيف يروق لهم أن يصطنعوا حكايات ويصدقوها قبل روايتها على
سامعيها، متى أصبحت أعراض الناس سلعة رائجة وحديث سمر
داخل سيارة أجرة، دون أن يوقفهم رجل رشيد عن ذلك الحديث؟
وما أدهشني أن السائق نفسه كان يقول في البداية أنه قادم
من سفر بسيارته ولم يعد إلى منزله حتى الآن، وبالرغم من ذلك
أدلى بدلوه وحكى كل ما يعرفه في تلك الأمسية الروائية التي
أضحت حديث الناس، فقال لهم السائق أن زوجته كانت عند

الدكتورة ناهد السعيد ليلة أمس وسمعتها تقول أن البنت ليست عذراء، ولكنها قالت أنها عذراء حتى تنقذها من القتل على يد أسرتها، وأن تحليل حمض ال DNA الخاص بالجنين أثبت أنه ابن خطيبها علاء، ذلك الشاب الفاسد الذي خان ثقة أسرة خطيبته. لم أعرف كيف أستقبل حكاية السائق، هل أضحك ساخرًا؟ أم ألعن ذلك الموقف الذي وضعتني فيه الظروف؟ متى سمع السائق بذلك الأمر؟ وهو القادم من سفر ولم يصل إلي بيته بعد، وأي حمض تم تحليله للجنين؟ وحمضي أنا الذي وافق نفس مادة DNA الخاصة بالطفل الذي أكمل شهره الرابع، يا للتخلف، وهل رأوها في شهرها الرابع ولم تقل لنا الدكتورة في أي شهر هي الآن؟. انتهى هشام من حديثه ليضيف مروان ما سمعه قائلًا أنه استيقظ من نومه الساعة السابعة صباحًا، على صوت جارتهم نبيلة، تنادي على أمه.

_ يا أم مروان، يا أم مروان.

_ ادخلي يا نبيلة، الباب مفتوح يا حبيبتي.

_ شفتي اللي حصل يا أم مروان؟ دي شكلها القيامة هتقوم.

_ يا ساتر يا رب، حصل ايه يا أختي بعد الشر؟.

_ البنت سلمى يا أختي اللي مخطوبة لعلاء صاحب مروان

ابنك.

_ عارفاها، مالها دي كمان؟

_ دي كانت هربانة من أهلها ليها عشرين يوم، ورجعت لهم

امبارح بالليل وهي حامل.

_ يا نهار أسود ومنيل، دي حتى مؤدبة ومروان ابني فرحان

لصاحبه إنه خطبها.

_ جاتها نبيلة فيها وفي أدبها، دي بنت شايقة نفسها ومثلونة،
وبتروح ترقص في أفراح صاحباتها وبتلبس العريان، اسكتي اسكتي
يا أم مروان مش عايضة أقول كل حاجة.
_ اللهم استر علينا وعلى ولايانا يا رب.

خرجت نبيلة من المنزل تاركة أم مروان تصفق على يديها
وهي تستعيز من الحياة وما فيها وتقدمت لتغلق الباب خلف
نبيلة، حتى توقظ ابنها مروان ليتناول إفطاره، فرأت نبيلة تقف
أمام شقة جارتهم سامية الموظفة بشركة الكهرباء، فرأتها خارجة
إلى عملها فأوقفقتها.

_ صباح الخير يا بشمهندسة سامية.

_ صباح النور مدام نبيلة.

_ شفتي اللي حصل يا حبيبتي؟

_ خير يا رب حصل ايه؟

_ مش البنت سلمى بنت عايضة، حامل من خطيبها علاء،
والواد مش عايض يعترف باللي في بطنها وساب لهم الدنيا وهرب.
_ الله أعلم بالناس يا مدام نبيلة، منعرفش الحقيقة فين، ربنا
يتولاهم برحمته الواسعة.

_ شكلك مش مصدقاني يا بشمهندسة سامية.

_ دي حاجة في علم الغيب يا مدام نبيلة، ودي أعراض ناس،
حتى لو صح مينفعش نتكلم فيها بعد إذنك علشان رايحة
الشغل.

ابتعدت سامية عن نبيلة قاصدة عملها، فوفقت نبيلة متضجرة
تنظر صوبها بغضب شديد وتكلمت بصوت عالي وكلمات مفهومة.
_ هي مالها الست دي شايقة نفسها علينا أوي كده، تكونش

هي الوحيدة الي متوظفة مهندسة في الكهرباء؟ ولا علشان بتقبض لها مرتب أد كده، تتكبر علينا، هي الدنيا جرى فيها إيه والناس بقت مش مستحيلة بعض كده ليه، أوف منكم جيران وحشين.

كل قصة تخرج من البيوت هي ألغن من أختها وأكثر منها خطورة، لو سمعتها سلمى لسقطت ميتة.

انتابني شعور بالخوف لأول مرة في حياتي، ما عدت أصدق أننا وصلنا لهذه الدرجة من اختلاق الموضوعات الماسة بالشرف، ليتني أدخل إلى أذهان هؤلاء لأرى كيف يضعون نهاية تلك المصيبة التي نمر بها؟ هل يتمنون لها النهاية السعيدة؟ أم أنهم يعشقون الإثارة ويتنظرون منها مزيدا من المفاجآت التي تزيد جلساتهم حلاوة، وتجعلهم يشتاقون لمقابلة بعضهم البعض حتى يتبادلوا سرد أحداثها؟ وإن كانت على حساب سمعتنا وأعراضنا، على حساب أعصابنا وجهدنا ووقتنا، بل على حساب حياتنا بأسرها.

نظرت إلى زين فعرفت أنه تعرض لموقف مثلهم، ولكنه يود التهرب، لا يستطيع أن يحكي ما سمع من الناس، بل كاد أن يصدقه، لبراعة الراوي وقدرته على الإقناع.

كان زين ينتظر طابور الصباح في المدرسة مع زملائه المعلمين، على الأريكة بجوار الباب لمراقبة سلوك التلاميذ أثناء دخولهم وخروجهم في تلك الساعة السابقة لدخول الفصول.

جاء إليهم الأستاذ سامح شاحب الوجه، وجلس بجوارهم، دون أن يلقي عليهم التحية وانصرف بوجهه بعيدا، ليسأله عن سبب وجوده.

_ خير يا أستاذ سامح، مالك ع الصبح مبوذ ليه؟!_

_ والله يا أستاذ بركات ما خير خالص الي بيحصل ده، شكل
القيامة هتقوم يا جدعان.

_ ما تقول حصل إيه وخلصنا، الجرس هيضرب وهنكشحو
على الفصول.

_ عارفين علاء زيدان الي شغال محاسب في البنك الأجنبي ده.
هنا استثار زين وانتبه له، ووقع فيه قلبه ذعر شديد، وصرخ
في وجهه متوسلاً إليه ليكمل الحديث.

_ ماله علاء يا أستاذ سامح؟

_ والله يا أستاذ زين موش عارف أقولك إيه، أنا عارف إنه
صاحبك وحبيبك.

_ أرجوك يا أستاذ سامح اتكلم علي طول، ماله علاء؟

_ علاء صاحبك ليه سنتين خاطب البنت الساذجة دي الي
اسمها سلمى، أخت خالد

_ أيوة ويعدين؟

_ ما واحدة واحدة عليا يا أستاذ زين موش عارف أجمع
الكلام بسببك.

_ والله حرام عليك تنقطنا بالكلام، أنا معدتي قلبت يا سامح
أرجوك.

_ أتاري البيه كان يستغل سذاجتها، واتضح انها حامل.

وقع الخبر على زين كالصاعقة، وبدأ يتصبب عرقاً، وهز رأسه،
وفوجئ بالأستاذ سامح يهيم واقفاً، يتحرك ببطء أمامهم وهو
يسرد التفاصيل التي لا تعرفها أنا ولا سلمى، وزين مخطوف ذهنياً
وقتئذٍ.

_ البنت كانت تكشف عند دكتور أمراض نفسية من سنتين،

علاء عرف إنها بتتعالج من مرض نفسي وإنها ساذجة، وهو مسكين عايز يتجوز بأي شكل، بس مفيش فلوس يعيش منها وكمان مفيش بيت، لأن الشقة اللي حيلتهم متجوز فيها أبوه، يعني مش هينفع هو كمان يجيب شقة.

راح الأفندي خطب الساذجة دي علشان يحسس نفسه إنه خاطب، وأهو بيزورها كل فين وفين، ويكلمها في التليفون، وعایش حياته، وعيش يا حمار لحد ما يشتغل ويأجر شقة ويفرشها، وأهل البنت كمان ما صدقوا إن حد يخطبها علشان يدبسوها له، قالوا فرصة وجات لحد عندنا ونستغلها، لحد ما الواد ربنا كرمه، واشتغل في بنك أجنبي، وبيقبض مرتب أد مرتب مدير الإدارة التعليمية عشر مرات، وحابب يخلع من الموضوع، وعلشان ربك بيفضح عباد السوء، البنت طلعت حامل في الشهر الثاني، و الدكتور كتب تقرير إن البنت ساذجة وبتعاني من مرض نفسي، وإن الواد علاء ده مجرم يستحق العقاب.

لم أسمع في حياتي عن مؤلف حكايات مثل الأستاذ سامح، حتى زين صديقي الذي يثق بي ثقة عمياء، كاد أن يصدق ما يرويه سامح، من تسلسل الحكاية، وجاهزيتها للوقوع على المسامح والمرور بسلام إلى العقل، الذي يصرح له بمس المشاعر ليتم تصديقها فتصبح واقعا. حتى إن زين فزع من اتصالي وترك المدرسة وأتاني مسرعا ليعرف حقيقة الأمر.

كانت لحظات صعبة مريرة لم أكن أتخيل أني بطل كل تلك الروايات، فكان حتما عليّ أن أقوم وقتها من مكاني مسرعا لأعود إلى سلمى، لأمنع كلام الناس من الوصول إلى مسامعها.

كانت سلمى تراقبه بخوف شديد وهي ترتعد، ترى خالد يعقد الحبل في منتصف الغرفة ويقيس دائرة الرقبة، تتمني لو تصرخ لتستغيث بالدنيا كلها لتفدّها.

المسكينة تراقب الموت وهو يُعَد لها، عيناها تدمعان، وحركات رأسها تتوسلان إليه أن يمتنع عقد حاجبيها يرسم علامة استفهام، كأنها تقول لماذا كل هذا القهر؟ ما سبب ميولك للانتقام؟ هل تفكر يا خالد للحظة واحدة أنك تربط ذلك الحبل لأختك، شقيقتك، الأقرب رحماً إليك؟

لم أتحمل المشهد، فوجدتني أمسك خالد الواقف على الكرسي في منتصف الغرفة وأحمله بين يديّ وألقي به على الأرض، ثم أرفعه من الأرض لألقي به ثانية، ورفعته وتبادلت يداي اللكمات على وجهه.

لم يستطع خالد الدفاع عن نفسه، لسرعة لكماتي، وشدة غضبي.

دخلت أمه لترى المنظر، وهي تصرخ، تسرع نحو ابنتها.

– بنتي بنتي سلمى بنتي .. حرام عليك يا خالد يا ابني هتموتني ناقصة عمر حرام عليك.

– من غير صراخ يا أم خالد، فكيفها بسرعة.

قامت أم خالد بحل قيود سلمى، وأنا ألقيت بخالد على الأرض مغشياً عليه.

– ليه يا خالد بس توصل الأمور للخنق لله يخرب بيتك؟ مفيش رحمة.

نظرت إلى سلمى التي تسلم نفسها للقيود، لا تصدق أنها عادت للحياة، تلقي يديها على الأرض، وتمد رجلها بطولهما كما كانتا، وتتنظر ناحيتي دون أن تتفوه بكلمة واحدة، وأمها تحاول

مساعدتها على القيام دون جدوى.

تقدمت إليها داعم العينين، فرفعتها من الأرض ووضعتها على سريرها، ولم أستطع بكاء أمها فبكيت بنحيب يعلو نحيبها، ما كنت أحب ان أرى سلمى على هذه الحالة أبدا.

أوقفت خالد وسكبت المماء على وجهه ليستفيق، ففتح عينيه.

_ انت ايه يا خي ، قالولك ان أختك عار عليهم، جاي تقتلها

بيدك، انت ايه من غير عقل؟

_ انت انسان واطي يا علاء، أنا عرفت النهاردة بس أن انت

ورا كل اللي حصل لأختي ده.

_ و ده عرفته ازاي ان شاء الله الكلام ده؟

_ أنا رحنت لأستاذ في كلية طب، وسألته عن موضوع حمل

أختي سلمى، وقال لي كل حاجة بصراحة، وعرفت انك انت السبب

في كل البلاوي اللي بتتحدف علينا دي.

_ وقال لك ايه الأستاذ الدكتور بتاعك يا ترى؟

_ الدكتور قال لي طالما حامل وهي لسة عذراء ولسة مخطوبة

يبقي مفيش غير سببين اللي العلم والعقل يقبلوهم، والسببين

وراهم انت، وأنا ناوي أخلص عليك بعد ما أخلص عليها.

_ لما تخلص نفسك من الوكسة اللي انت فيها دي، أنطق، قال

لك ايه الدكتور؟

_ أنا مش هعرف أقول كلامه زي ما هو قاله، بس هما سببين

وانت أساسهم.

_ واسمه ايه الدكتور ده وأنا أروح أسأله معاك تاني، يا أبو

مخ فاضي.

_ أنا مش هروح معاك أماكن يا علاء، أنا لو انفردت بيك هقتلك.

_ نروح للدكتور نسألّه، ولو طلع كلامك صح اقتلني، بس أرجوك ترحم المسكينة دي يا خالد لحد ما نتأكد من الموضوع، سيبك من عمك رأفت وأفكاره، ده ناوي يقضي عليكم خالص، أنا قلت قدامه هتجوز سلمى، مد بوذه شبرين قدامه ومشي.

_ انت بتشتغل نفسك ولا بتشتغلنا، فين شقتك، فين الفلوس اللي معاك اللي هتفرش بيها الشقة في أسبوع زي ما بتقول، انت معاك سنة في الشغل علشان تقدر تدفع خلو شقة.

_ النهاردة هنروح للدكتور نسألّه أنا وانت، ولازم أعرف رأيّه إيه في المصيبة اللي احنا فيها دي، أما سلمى، بالطول بالعرض هتجوزها، هنكتب الكتاب الأسبوع ده وهنعلن للعالم كلها إنها مراتي، و بعد كده هأجر شقة بدون خلو، واللي قاصد خير ربنا بيكرمه.

_ سرعتك في الجواز دليل إنك بتصلح غلطتك.

_ حاضر يا خالد، نفوق أختك دي اللي بهدلتها و بعد كده بإرادتك أو غضب عنك هنروح للأستاذ ده، حتي لو في عيادته، ونسألّه عن السبب العلمي بتاعه ده.

قام خالد منصرفا عن الغرفة، وخرجت أم خالد من الغرفة تحضر عصير الليمون، ولم أتردد لحظة واحدة في التحرك ناحية سلمى، وجلست جوارها وأنا مشفق عليها، وهي تراقبني بعينين صامتتين، فمدت يدها ببطء، تحاول أن تمسك يدي، فقدمت يدي إليها، حتى لا أرهقها في تقريب يدها، فأسندت خدها على يدي، وقامت بتقبيلها، لأول مرة منذ خطبتنا، ولكن قبلاتها لم تكن سوى قبلات مسكين قدمت له المساعدة. كانت قبلاتها عرفانا بالجميل لتلك اليد التي رفعت عن كاهلها عبئا ثقيلا.

_ لا يا سلمى، اياك تنكسري كده.

ورفعت يدها فطبعت في ظهرها شفتي، ولم أرفعهما إلا بدخول
أمها تحمل صينية مستديرة عليها كوبا من عصير الليمون.

_ ربنا يبارك فيك يا علاء يا بني وما يحرمنا منك.

_ خالد راح فين يا أم خالد.

_ خالد قاعد برة، بس عيونه بتدق شرار.

ساعدت سلمى كي تتكئ على السرير في نصف جلسة، حتى
تستطيع شرب كوب الليمون كانت غارقة في دموعها الصامتة تنظر
إليّ.

_ خالد كان هيموتني يا علاء، أنا شفت الموت والله، شفت الموت يا
علاء، كان هيخنقني.

_ ما عاش ولا كان اللي يخنقك وأنا على وش الدنيا يا سلمى.

انفجرت سلمى في البكاء وهي تردد : متسيبينش يا علاء متسيبينش.
فوجدتني أضمها إلى صدري وأنا أبكي، بكاء الرجل الكبير الذي
تحتضر أمه بين أحضانه احتضنتها كما احتضنت أمي في لحظات وداعها،
وأنا أراها تفارق الحياة.

_ لا يا سلمى، أمي مش هتموت ثاني، مش هتموت ثاني يا سلمى، أنا
سندك في الدنيا دي ومش هسييك لحظة بعد النهاردة، لحد ما نشوف
حل لكل اللي بيحصل لنا ده.

ساعدتها ووضعت كوب الليمون عند طرف شفيتها، وساعدتها حتى
شربت نصفه، وأومأت لي أنها تود أن تسند رأسها على الوسادة لتستريح،
فساعدتها برفق وكأنها طفلي حديثه الولادة حتى استوت على فراشها.

خرجت إلى خالد، ورافقته إلى ذلك الأستاذ بكلية الطب لأعرف منه حقيقة الأمر حتى أستطيع إيجاد الحلول، فكلما مرت الدقائق، ازدادت القصص و اختلقت الناس الأحاديث، وأصبحت أنا وسلمى وليمة طازجة على كل الموائد.

وصلنا إلى العيادة، و قابلنا موظف الاستقبال المسئول عن تنظيم الدخول إلى غرفة الكشف.

_ ممكن نقابل الدكتور؟

_ حضراتكم حاجزين من إمتي؟

_ لا إحنا مش حاجزين، بس لازم نقابله ضروري.

_ أنا آسف جدا، مش هينفع تدخل للدكتور بدون حجز مسبق.

_ بس احنا معانا حالة خطيرة، حياة أو موت.

_ دي عيادة نساء وتوليد، وأنا مش شايف معاكم حالات.

_ هنستفسر منه استفسار صغير ممكن يكتب الحياة لبنت مسكينة.

_ أنا آسف جدا، الناس الموجودة بالعيادة دي حاجة من أسبوع وأكثر كمان.

_ إحنا مش هنججز، إحنا هنستفسر بس.

ثار خالد على ذلك الشاب المسئول عن الحجز، وأراد أن يمسكه من ملابسه ويبدأ مشاجرة معه، ولكنني تفاديت الموقف سريعا وجذبت خالد إلى الخلف، وأخرجت عملة ورقية قيمتها عشرين جنيه، وقدمتها لذلك الشاب لا يراها أحد في العيادة سواه.

_ الله يبارك فيك يا أستاذ تدخلنا للدكتور، هنسأله واحنا واقفين، أنت بس قول له حياة أو موت و هو هيقول لك سببهم يدخلوا.

مد الشاب يده بحركة خفيفة بمحاذاة المكتب الجالس عليه، وأمسك بالعشرين جنيه، وجذبها إليه قابضا عليها، ثم وضعها في جيبه، وأشار لنا بالجلوس بجوار مكتبه.

لم تمر دقائق حتى خرجت الحالة التي في غرفة الكشف، ودخل الشاب إلى الغرفة ثم خرج إلينا يشير لنا بالدخول.

دخلت ومعني خالد إلى الطبيب الذي يرتدي ثوب الوقار، تحمل كل شعرة بيضاء في رأسه عمرا طويلا من العلم والمعرفة في مجال الطب، وتخرج من بين شفثيه ابتسامة قادرة على رفع الألم عن الحالة التي تُعرض عليه، ويملك من الذكاء ما يجب أن يملكه كل أطباء الدنيا في شتي التخصصات.

سردت عليه حكاية سلمى، وما نمر به، فكان يتمتع بحسن الإصغاء للحديث، ولم يتكلم إلا بعد ما انتهيت من كلامي، فهز رأسه قائلا:

_ أنا قلت لصاحبك ده الصبح لما سألني في الجامعة، حمل العذراء ده شيء غير مقبول عقلا ولا علما ولا منطقا أصلا، والحالة الوحيدة اللي اتسجلت في عمر البشرية، كانت حمل السيدة العذراء مريم عليها وعلى السيد المسيح السلام، وحملها السيدة مريم كان معجزة طبعاً وأكد حضرتك عارف كده.

_ طيب الحالة اللي معانا دي يا دكتور، ثلاث دكاترة أكدوا إنها حامل، ومنهم دكتورة تأكدت من حملها.

_ لو ده صحيح فعلا، يبقى احنا قدام حالة من اتنين بتحمل فيهم العذراء، بس تركزوا معايا شوية.

_ اتفضل يا دكتور، احنا ناس مثقفين بردو وهنستوعب كلام

حضرتك

_ الحالة الاولى إن الفتاة ممكن تكون بتملك غشاء بكارة مطاطي، وده لا يزول بالإيلاج زي باقي الأغشية، وعلشان كده تبدو الفتاة في كشوفات العذرية أنها لسة عذراء، وممكن تحمل طفل كمان وغشاءها لم يزول.

_ و ايه الحالة الثانية يا دكتور؟ لأن سلمى عمرها ما اتعرضت لأي حالة من دي.

_ أنا مليش دعوي بسلمى أو غيرها، أنا بتكلم عموما، وياريت تسييني أتكلم.

_ أنا آسف يا دكتور، اتفضل حضرتك.

_ الحالة الثانية .. ودي حدوثها وارد بنسبة ضئيلة جدا، وهي إنها ممكن تحمل وهي عذراء وبدون إيلاج أو غشاء مطاطي. نظرت إلى خالد فوجدته في قمة تركيزه، وأنا فتحت عيني وأذني وأنفي وكل حواسي لتلقي الحالة الثانية بشيء من التركيز، قد تكون هي المقصودة بحالتنا.

_ ايه هي يا دكتور؟

_ حالة الحمل دي بتحصل في حالة العمليات الجنسية الناقصة، واللي بتتعرض فيها الفتاة لقذف بدون إيلاج في أماكن معينة، وهنا قد تخترق الحيوانات المنوية الغشاء وتنفذ إلى الرحم وممكن تكون عملية زي دي هي السبب في حالة الحمل.

هنا سقطت الكلمات على رأسي سقوط أحجار مبنى مكون من عشرات الطوابق على رأس حارسه الغارق في نومه.

_ مش قلت لك يا علاء إنك السبب.

_ استنى انت يا خالد لحظة.. بس يا دكتور دي متعرضتش

لأي حاجة من دول.

_ يبقي تجيبيها لي وأنا أكشف عليها بنفسي، يمكن أفيديك أكثر، وياريت دلوقتي تتفضلوا علشان تفسحوا المجال للحالات اللي برة. نظرت إلى خالد الذي استعاد غضبه، وتفهم الأمر جيدا وعرف أن أخته مذنبه لا محالة وخرجنا سويا من العيادة، واتجهنا ناحية موقف الميكروباص، وركبنا على مقعد واحد واجمين لا يكلم أحدا الآخر.

جاءني الشيطان من يساري، يوسوس إليّ محاولا رسم الصورة الكاملة لما حدث.

أتاني الشيطان ليربط لي بين ما سمعناه من استشاري النساء والتوليد، و بين ما تمر به سلمى من حالة الحمل المفاجئ الذي تعرضت له، وقد أكد لي الأخصائيون أنها لم تزل عذراء.

أصغيت إلى شيطاني كما كنت منصتا لسماع تشخيص الطبيب لحالتنا، فرميا يعرف الشيطان ما لا أعرفه، أو يقنعني بما لم أستطع أن أقنع به نفسي من شدة حبي وتمسكي بسلمى خطييتي.

قال لي شيطاني:

_ لا بد أن تقف مع نفسك دقائق يا علاء، حتي لا تندم بعد ذلك، لا تجعل إشفافك على سلمى يتسبب في إقدامك على الزواج بها، دون أن تعرف كيف حملت، وممن حملت، أنا أعلم تماما أنك إنسان خلوق، طيب القلب، تشفق على فتاة خطبتها تلك تلك الفترة، تجملت فيهما أمامك وارتدت ثوب العفاف في زيارتك، لتوهمك أنها لم ولن تعرف رجلا غيرك، وها هي ذا حقيقتها تنكشف أمامك يا علاء.

كيف تكون شابا مثقفا، وتصدق أنها حامل دون أن يمسه أحد، فمن أين لها بتلك الحيوانات المنوية التي قال عنها

الطبيب؟ وأنت تثق في نفسك تمام الثقة؟ من أين لها بذلك
الجنين؟ استيقظ لنفسك ولا تكن فريسة سهلة لادعائها الشرف
هي ووالدها أمامك، فالأمهات هن سبب انحراف الفتيات، هن
السبب في خراب كل البيوت.

لا بد أن تعرف يا علاء أن أم سلمى تعرف الحقيقة الكاملة
لهذا الحمل، وتعرف أن جارهم هو والد الجنين.
ضربني خالد بقوة على كتفي فانتبهت له.

_ ايه يا خالد بتضرب ليه؟

_ ما أنا ليا ساعة بنادي عليك يا علاء يا علاء يا زفت، وانت

مش معايا خالص.

_ عايز ايه؟

_ هتعمل ايه دلوقتي بعد ما عرفت انك انت السبب في كل

المصايب دي؟

_ بردو هتقول لي اني السبب في المصايب دي؟

_ يعني ايه؟ ما انت سمعت الدكتور بيقول ايه.

_ طاب استني نزل من العربية، مش ناقصين فضايح.

_ محدش يعرفنا فيها العربية دي، قول لي هتعمل ايه.

_ اللي فيه الخير يقدمه ربنا يا خالد.

أدرت وجهي بعيدا عن خالد، أبحث عن شيطاني الذي فر مني
بعد ما ألقى على مسامعي تلك الكلمات، تركني شيطاني قبل أن
أخبره أن الطبيبة أكدت لي أنها لم تنزل عذراء، وأن الطبيب الآخر
قال أنها عذراء، كيف لها أن تعرف أنها لن تحمل؟ أين أنت أيها
الشيطان؟ تعالی هنا أخبرني، لا تتركني أعاني من وساوسك دون أن
تقنعني بالأمر كله، أيها الشيطان أين أنت؟ أين أنت؟.

يا إلهي! لم أدر ما الذي غيرني فجأة هكذا؟ لم أعد أطق سلمى ولا ما تمر به سلمى، لا أتحمل خالد جواري لأنني أشم فيه رائحتها، ليتني تركته يقتلها لئننتهي من كل تلك الأفكار.

وصلنا إلى شارع سلمى، ونزلنا من السيارة، وتركت خالد يعود إلي بيته وحيدا، وانصرفت إلى بيتنا، وأنا سارح أفكر في أمري الذي وصلت إليه، هل أتزوج بتلك الخاطئة التي خاننتي وخانت إخلاصي لها ولحبها؟ هل أتزوجها مشفقا عليها ولا أشفق على نفسي وأبي؟ كيف يحدث كل هذا في يومين فقط؟ ما الذي وصلت إليه الآن؟

دخلت إلى غرفتي وأنا أحمل هموم الدنيا بين جنبي، وصوت هاتفي يرن مرارا وتكرارا ولكني لا ألتفت إليه، فالمتصل سلمى. كلما نظرت إلى شاشة هاتفي المحمول وجدت فيه سلمى تتصل بك، وأنا لا أستطيع الرد على سلمى، ولا حتى تذكرها. ألقىت بهاتفي جواري، وأنا أعلم أنها تتصل بي لأنقذها من شرور خالد، ولكنني هذه المرة أتمنى لو يتصل بي خالد يخبرني أنه تخلص منها ليقتلها، فيستريح قلبي.

نعم تلك أمنيته الآن، بعد أن صدق الشيطان، فمن أين أتى لها هذا الحمل؟ لا بد وأنها ضاجعت رجلا، وكدت أن أكون ضحية تلك العملية التي دبروها لي ليليل لأقع في شباكها.

شكرا لك أيها الشيطان فقد جئت في الوقت المناسب لتنقذني، لولم يك صادقا لما أخبرني بالحقيقة، بعد ما تأكدنا من التفسير العلمي لظاهرة حمل سلمى وهي تحتفظ بعذريتها.

هاتفني لم يتوقف عن النداء تلك اللحظات، فأخذني فضولي لأجيب سلمى وأرد عليها، لأعرف ما الذي فعله فيهم خالد،

فرايتها تسأل عن سبب عدم عودتي مع خالد إلى بيتهم، فأخبرتها
أني مرهق الآن ولا أستطيع التقاط أنفاسي.

نزلت بعدها إلى الشارع وأنا في حاجة إلى أي عمل أفرغ فيه
طاقتي المكبوتة لأنسى ما أنا فيه، فخرجت إلى الملعب وأنهكت
نفسي في لعب الكرة مع رفاقي، حتى منتصف الليل، ولم أعد
إلى بيتنا سوي تلك اللحظات التي أفكر أستعيد فيها ما لاقيته
في يومي، كل ذلك الوقت منذ عودتي وأنا أحاول الخلود للنوم،
ولكنني راجعت يومي منذ لحظة المحاكمة ثم مقابلة رفاقي
زين وهشام ومروان، ومحاولات خالد لشنق سلمى، ثم ذهابنا
للاستشاري و إنصاتي لشيطاني إلى أن نامت عيني لعدة ساعات.
و لكن إلي أين تسير الأمور؟ لديّ فضول شأني شأن أهل
المنطقة، أود أن أعرف ما نهاية القصة؟ كيف تنتهي الحكاية؟
هل يقتلها خالد؟ أم يقتلها رأفت؟ أم يجتمعون عليها فيقتلونها
بطعنة رجل واحد؟ أم أنهم ينتظروني أفي بوعدني لهم وأتزوج بها
لأخلصهم من عارٍ أصابهم؟.

استيقظت التاسعة صباحا على صوت والدي يطرق عليّ باب
غرفتي ليخبرني بأن خالي زاهر ينتظرني بالصالة.

_ يلا يا علاء خالك زاهر مستنيك برة.

_ خالي زاهر! انت متأكد يا بابا؟

_ هو أنا اتجننت يا علاء؟ ما تقوم يلا.

قمت من مكاني وأنا عسي يقين أن والدي أخطأ في معرفة اسم
الزائر، فخالي زاهر يكرهني منذ صغري، ولم يحضر عزاء والدي،
كيف يتذكرني الآن وهو لم يحضر عزاء أخته شقيقته؟

خالي زاهر الذي يمتلك مصانع الجرانيت والرخام، ويمتلك المحاجر والمعدات الثقيلة اللازمة للعمل فيها، خالي زاهر الذي يعمل لديه آلاف العمال والمهندسين، خالي زاهر يزورنا الآن! ويطلبني بالاسم، لالالا لا بد أن والدي أصابه شيء ما. خرجت من غرفتي لأتبين الأمر، فوجدته ببدلته الفاخرة وسيجاره الذي يشبه مقبض الأبواب العتيقة، ويجلس في كبريائه واضعاً قدمه اليمني فوق اليسري بالصالة. تقدمت إليه وأنا في قمة ذهولي سائلاً نفسي، ماذا يريد مني هذا الرجل، الذي لم يقف حتي لمصافحتي؟ لا بد أنه لم يأتٍ مشتاقاً لرؤيتي، فمن تجاهل جنازة أخته، لا يمكن أن يشترك لرؤية ابنها أبداً.

_ صباح الخير يا خالي.
_ اسمي زاهر بيه يا ولد.
_ أنا آسف يا زاهر بيه.
_ ايه يا ولد الكلام اللي منتشر على ألسنة الناس ده؟
_ كلام ايه يا خالي! آسف .. قصدي يا زاهر بيه.
_ البنت خطيبتك حامل منك والدنيا كلها سمعت الخبر.
_ مش حامل مني يا زاهر بيه، دي حامل وهي لسة عذراء.
_ يعني إيه حامل و لسة عذراء؟ انت هتشتغلي يا ولد انت.
_ ده كلام الدكاترة مش كلامي.
_ انت لازم تتجوز البنت دي وتخلي كلام الناس ده كله يبطل.
_ انا مش هتجوز واحدة حامل وانا مش عارف مصدر حملها ايه.

_ يعني مش ايه عارف مصدر حملها؟ الناس كلها بتتكلم.

_ مليش دعوي بحد، أنا عارف نفسي.

_ اسمع يا ولد انت، أنا داخل على منصب سياسي حساس،
والجهات الأمنية بتتحرى عن الأقارب من الدرجة الثانية، ولو
سمعوا بالفضيحة بتاعتك دي، هتدمر كل حاجة، وابني كرم اجتاز
اختبارات النيابة العامة، ومتوقف على التحريات دلوقتي، ولو
موضوعك ده انتشر هتدمر مستقبل الولد، انت لازم تتجوز البنت
دي، فاهم ولا مش فاهم؟.

_ يعني سيادتك جاي تحافظ على مستقبلك ومستقبل ابنك؟
وفي داهية مستقبلي أنا.

_ لما تكون انت السبب في كل ده لازم تتحمل نتيجة عمالك.

_ أنا معنديش فلوس للجواز.

_ أنا مستعد أكتب لك شيك ب 100 ألف جنيه دلوقتي
وتتجوز.

_ ههههه 100 الف جنيه ايه اللي تجوزني دي يا زاهر باشا؟

_ يكفيك كام؟

_ أنا علشان أتجوز عايز لي مليون جنيه، وبردو مش هتجوز.

_ اسمع يا علاء، أنا مش هضحى بوضعي ومكانتي ومستقبل
ابني علشان تصرفات ولد طايش زيك، أنا دلوقتي رايح المكتب،
وتعمل حسابك انك هتتجوزها غصب عنك، وهكتب لك شقة في
البرج بتاعي، وهكتب لك شيك بمليون جنيه تتجوز منه وتعيش
بالباقى.

انصرف خالي زاهر وهو في قمة ثورته وغضبه، ليضع بداخلي
علامة استفهام جديدة، بل علامة استنكار لهذا المجتمع الزائف
الذي نعيش فيه.

يا لها من مصيبة كشفت عن مصائب، لم يكن حمل سلمى بمثابة الأمر المذهل لاستحالة حدوثه، ولكنه كان مذهلا لما له من أثر السحر الذي رفع الغبار عن طبائع البشر، بل كشف النقاب عن ذلك العهر الذي نعيشه.

بدأ الناس باختلاق القصص والحكايات، عن طبيعة علاقتي بسلمى، وها هي ذا تنتهي بخالي زاهر الذي لم يأت لينقذني من مصيبي بثروته التي يمتلكها، لم يأت خالي منذ عامين ليعرض عليّ المساعدة في إتمام أمر زواجي من سلمى، ولكنه أتى الآن ليدفع مليون جنيه، وشقة فاخرة في برج سكني أقيم في منطقة راقية، لينقذ منصبا سياسيا لم يتقلده بعد، ولينقذ وظيفة قضائية ينتظرها ولده، جاء ليدفع تلك المبالغ لينقذ سمعته، ولكنه تأخر في عرضه هذا، تأخر كثيرا جدا، ليته طرقت بابي صباح أمس، كنت تناوبت على وجهه بقبلائي، وأسرعت إلى سلمى لأبشرها بحل مشكلتنا بتلك الأموال، ولكن أين سلمى من نفسي الآن؟.

دخلت إلى غرفتي وأنا في أمس الحاجة للنوم، كم أنا محتاج إلى الموت لينتشلني من هذا العالم المزيف، إما مزيف في كينونته، أو مزيفا لحقائق المحيطين به.

وجدت نغمة الرسائل على هاتفي المحمول تتوالي تباعا، فأقدمت عليه وأسندت رأسي على وسادتي وفتحت الرسائل، فتحتها فوجدتها من سلمى تقول فيها :-

«علاء .. أرجوك، أبوس إيديك ورجليك، ورحمة أمك الغالية يا علاء، مينفعش انت بالذات تتغير ناحيتي، والله أنا ما متمسكة بالحياة غير علشانك، وإلا كنت انتحرت من اللحظة الأولى اللي سمعت فيها بالمصيبة السوداء دي، مش عارفة ليه حاسة أنك

متغير من ناحيتي من ساعة ما رجعت من عند الدكتور؟ هي دي وعودك انك هتفضل جنبني ومش هتسييني؟ هو ده كلامك يا علاء على انك بتثق فيا ثقة عمياء؟ هي ليه الثقة دي اتبخرت مع أول زيارة للشيطان يوسوس لك فيها؟ حرام عليك أنا بتعذب والله، بتعذب يا علاء، رد عليا أرجوك، عبرني يا أخي، قول لي مش عايزك علشان أقتل نفسي وأوفر عليك وعليهم كل اللي انتوا فيه، أنا تعبت يا علاء تعبت، والله ما خفت من الموت وأنا شايقة خالد بيجهز لي مشنفتي في الأوضة غير علشانك، كنت خايقة أموت وأسيبك يا علاء، أنا نفسي أموت بجد، بس مش عايزة أموت واسيبك .. تجاهلك ليا ده أصعب عليا م اللي كان هيعمله خالد فيا، أنا بتخرط أرجوك، لو انت مصدق فيا حاجة، أنا مستعدة أروح معاك عند الدكتور بكرة، واللي هيقول عليه هصدقه معاك، بس متسيينيش في نص الطريق، وبعدها هقتل نفسي وأريحك مني، هقتل نفسي علشان انت تعيش مرتاح، مش علشان أنا ارتاح، أرجوك يا علاء ارحمني، كفاية اللي أنا فيه، حرام يا علاء، حرام، ارحمني».

_ ليه بس يا سلمى بتعملي فيا كده، ليه؟

لم أشعر بنفسي وأنا أبكي كالطفل الصغير أثناء قراءة لرسالتها، رأيت في كلماتها صدقا كنت قد اعتدت رؤيته في عينيها وهي تخاطبني، كلماتها لمست قلبي، فطردت شيطاني الذي يلازمني، وأقنعت نفسي أن بيني وبينها استشاري النساء والتوليد.

لكن.. ما الذي يحدده طبيب النساء والتوليد؟ حتما سيخبرنا أنها حامل وعذراء، وأن حملها نتج عن إحدى السببين الذين ذكرهم لنا.

يبدو أنني عدت لسابق عهدي بسلمى، أنا مشفق عليها الآن، كلا بل أثق فيها، هي لم ترتكب جرما، نعم سلمى لم ترتكب جرما، وهذا الأمر قد يحدث مرة كل ألف سنة، وقد حدث هذه المرة فكان من نصيبها، نعم هو كذلك، لالا هو أمر يحدث لمن يحب بصدق ويرى في خطيئته عوضا عن أمه، لا لا هي ليست هذا ولا ذاك، هي حقيقة كونية لم يتوصل لها الطب بعد.

نعم هي كذلك، وسيتوصل لها العلم يوما ما، وسيكللنا العالم بسبقه فيها، لالا هي اختبار من السماء لتري كيف نقبله، نعم هي كذلك، و ما دام المحيطون بنا قد اختلقوا أقوالا فهم كاذبون ودعاة شر، ونحن أولي خير، نعم فالخير دائما في المربع الآخر بعيدا عن الشر.

ارتديت ملابسى وأسرت الخطي إلى سلمى، لعلي أرى في عينها ما يكمل اقتناعي ببراءتها يكفي ما تلاقيه من هوان.

ذهبت إلى هناك، لأعاني ويلات الطريق ثانية، لأسمع من الناس ما لا أحب سماعه، لأرى بعيني هذه المرة التجمعات البشرية الهائلة، لم يجتمعوا لمناقشة الأمر بأسلوب علمي متحضر وتفنيدي الآراء للوصول إلى تفسير مناسب، ولكنهم يستمتعون بالأحاديث الشيقة التي يبدعون سردها تباعا مصورين لبعضهم البعض مشاهد درامية سبقت ذلك الحمل فتسببت فيه.

وصلت إلى ورشة إبراهيم الكاوتش، والتي فتحها أول مرة لتصليح السيارات والدراجات البخارية، ولم يكن في حسابانه يوما أن يفتح فيها فرعا يوما ما ركنا لسيرة الناس، ليدي كل عضو فيه بدلوه في حديث الموسم، ليتولي أحد أفرادها المشاهد المثيرة، والآخر مشاهد الليل داخلي، وآخرون أفاصيص النهار.

توقفت عندهم ولم يشعر بي أحد، لأنهم مشغولون بتلك الروايات التي يرويها عليهم إبراهيم الكاوتش ورفاقه من الصنایعية بالورش والمحللات المجاورة، ليستغلوا تلك الفترة من النهار والتي يضعف فيها إقبال الزبائن، فيتبادلوا التقطيع في جسدي وجسد سلمى التي لم أعرف حتى الآن إن كنت أدينها وأوجه لها بيني وبين نفسي اتهاماً مباشراً بارتكاب جريمة بعينها تسببت في حملها، أم أشفق عليها وأصدر قراراً ببراءتها.

كان إبراهيم الكاوتش جالساً في المنتصف وأمامه علبة الكشري يأكل فيها وهو يتكلم إليهم وهم ينصتون، تتغير ملامح وجوههم مع تغير الأحداث التي يرويها لهم الكاوتش، عما حدث بيني وبين سلمى، حتى أنني تفاعلت معهم فقال لهم الكاوتش:

_ الواد علاء ده ولد مش ساهل أساساً، قال في نفسه الظروف معايا في الأرض، وأنا بكح تراب، و مش هقدر أتجوز سلمى، قوم يعمل معاها الدنيئة علشان يتورطوا معاها ويضطروا يجوزوها له، حتى لو مش هيقدر على مصاريف الجواز، يساعده المساكين دول بكل اللي يقدروا عليه، مصاريف فرح وفرش بيت، وأجهزة كهربائية، وكل اللي هتحتاجه الجوازة دي علشان تتم.

_ بس ده اتعين في بنك أجنبي يا معلم كاوتش.

_ بعد ايه اتعين في البنك، مش بعد ما ورط البننت معاها، وعمل اللي عمله معاها، ده مرة في يوم شم النسيم اللي فات ده، أخذها معاها الكورنيش قال إيه يفسحها، ما قعدش معنا غير نص ساعة بس علشان يخلي الناس تعرف إنه كان ع الكورنيش، وبعد كده اتصل بتوك توك جاله وسحب فيه البننت ومشي بيها، فآكرنا مغفلين طبعاً ومختومين على قفانا، أنا سبت العيال مع

أهمهم ع الكورنيش، وجيت واخذ موتوسيكل الواد الناغي، وسحبت وراه، التوك يطلع من حارة يدخل في حارة وأنا وراه، لحد ما وقف عند فرش خضار على ناصية حارة في الوايلي، ونزل الواد علاء من التوك توك واشتري من الراجل شوية جزر على بطاطس على طماطم وبصل ورجع التوك توك تاني، ومشى بيهم، وأنا مكذبتش خبر وسحبت وراهم برده، لحد ما وصلوا عند عمارة قديمة جدا و المدخل بتاعها هابط عن الأرض شوية، نزلوا من التوكتوك و دخلوا العمارة، رحى أنا ركنى التوكتوك ومشيت وراهم، هموت وأشوفهم رايعين فين، لحد ما دخلوا الشقة اللي في الدور الأرضي، و الواد كان معاه مفاتيح الشقة دي، و ناس الشارع عارفينه لأنه ولا حد كلمه ولا استغرب هو داخل الشارع بالبنى ازاى ولا أي حاجة، و بعدها جيت أنا راكب موتوسيكل الناغي ورجعت على طول. _ شوف ازاى؟ يطلع منه كل ده ويعمل علينا احنا شريف وابن ناس .

ابتسمت ابتسامة ساخرة، وأقسمت بيني وبين نفسي أني لو سمعت القصة عن شخص آخر غيري لصدقت أحداثها، و لولا أني أنا بطل قصة إبراهيم الكاوتش لأطلقت سهام شتامي على ذلك الخائن الذي استدرج خطيبته الساذجة إلى تلك الحوارى. قام من بين الجالسين رجلا أربعيني العمر، لم أراه في حياتي، ولا أعرفه، ولا أظن أنه يعرفني، ظننت أنه سيمصرخ فيهم لوقفهم عن ذلك الأمر، فتأهبت لأسمعه جيدا فقال :

_ أنا مرة كنت في القسم بتغدى مع زميلى أمناء الشرطة، راح اتصل بيا الظابط يقول لي هات كل الأفراد اللي عندك طالعين حملة مستعجلة، قلت له هنروح فين يا باشا، قال لي هحكيلك في

الطريق، علشان الأمناء والأفراد الي عندك ميعرفوش احنا رايعين
فين لحد ما نوصل، قلت له أوامرك يا سيادة المقدم، ثواني هكون
عندك أنا وكل الي معايا، المهم يا ابراهيم لقيت قوة كبيرة واقفة
قدام القسم، والكل شادد الأجزاء، ومستعد كإننا رايعين حرب
سألت النقيب أحمد فتحي، احنا رايعين فين يا سيادة النقيب،
قال لي والله ما اعرف، سألت زميله النقيب شهاب عبداللطيف،
قال لي والله ما اعرف، وأول ما طلع المقدم محمد يونس من
القسم، رحى قلت له ما ترسيني ع الدور يا باشا احنا رايعين
فين بالظبط، قال لي هقولك انت بس، و تخليها في سرك لحد ما
نوصل، حتى الظباط متقولش لحد فيهم، وقال لي اننا رايعين
نهاجم وكر عمليات إجهاض بالمخالفة للقانون بيديروه أطباء
فاسدين ومعاهم ممرضين من كام مستشفى حكومي كده، و أول
ما وصلنا هناك، واقتحمنا الوكر ده، لاقينا، كل بنت معاها شاب
قاعدين منتظرين الدور بتاعهم، سألني المقدم محمد يونس ان
كان ليا حد في الناس دي أعرفه قلت له لا يا باشا معرفش حد لو
عايز تقبض عليهم اقبض ولا يهملك، راح المقدم دخل على أوضة
الإجهاض لقي الحالات الي جوة، وقبض عليهم كلهم، وقبضنا ع
الحالات الي منتظرة دورها، ولاقيت الواد علاء ده ومعاها بنت
عرفت بعدين ان اسمها سلمى، جيت مسكت فيه وضربته بالقلم،
قلت له بتعمل ايه يا حمار هنا، الواد اترعش كده ومعرفش
يتلم على أعصابه من قوة القلم، قلت له يا ابني انت مش
ساكن في الشارع الي جنب ورشة ابراهيم الكاوتش قال لي أيوة يا
باشا ساكن هناك، قلت له كنت قلت لي يا غشيم، مش شايف
المقدم بيسألني، رحى قلت له خد البنت الي معاك وامشي من

هنا يلا، وطلع يجري وساب البننت تجري وحدها النقيب شهاب
راح موقفهم ع الباب عايز يقبض عليهم، قلت له سييهم يا سيادة
النقيب دول تبعي، راح النقيب سابهم يمشوا.
_ انت غلطان يا سيادة البلوكامين كنت قبضت عليهم أحسن.

_ والله الواحد مش بيرضى يقبض على حد من المنطقة يا
ابراهيم يا كاوتش يا خويا، علشان ميقلوش أهو بكري ابن
الحتة أشهر أمين شرطة في الداخلية ومش بيخدم ناسها، ما انت
عارف ان الكلام كثير في الموضوع ده.
هنا ضحكت بصوت عال لم أصدق ما أسمع، حتى أنهم رأوني،
ونظروا ناحيتي، وتصفحوني من أعلى لأسفل، ونظرت لأمين الشرطة
الكاذب وقلت له:

_ يعني انت عايز تفهم الناس، إن المقدم أخفى سر الحملة عن
اتنين ظباط برتبة نقيب، وقال لك انت ع السر، وكمان المقدم
ساب كل حاجة جوة الوكر وسألك لو ليك حد معرفة خليه يمشي،
ولما طلع لك حد معرفة اسمه علاء، جيت ضربته بالقلم علشان
مناداش عليك يقول لك الحقني يا باشا، ولما النقيب وقفه، انت
أمرت النقيب يمشي، و الناس طبعا مصدقك.

_ انت مين انت علشان تكلمني كده؟ أنا بلوكامين القسم يا
أستاذ متنساش نفسك.

_ كمان مش عارفي مين، ده انت سنينك سودة أساسا.
_ والله ما آجيلك لأجرجرك من رقبتك ع القسم واعمل عليك
حفلة .

_ أولا لو رحنا القسم أنا وانت هخلي المأمور يحولك للمحاكمة
العسكرية ع الكذب اللي بتكده ده، والناس دي كلها شاهدة عليه.

_ أنا مش بكذب على حد والناس عارفاني بقول الحقيقة.
_ يا راجل انت مش قادر تعرفني أنا مين .. طيب أنا علاء
اللي انت عرفته في الوكر وضربته بالقلم، ولا عرفنتي في الوكر لما
شفتني أول مرة، ومعرفتنيش دلوقتي؟ يا نصاب يا أونطجي ..
والله انتوا ناس عايزة الحرق بالنار، وانت أولهم يا ابراهيم يا
كاوتش يا بتاع التوكنوك .. لو انت راجل صادق، هات ميكروباص
يا كاوتش ناخذ فيه الناس دي دلوقتي ونروح على الشقة اياها
ونشوف ان كان في فرش خضار، ونشوف الأهالي هيعرفوني ولا لا.
_ روح يا علاء من قدامي دلوقتي، أنا مش بكلم حد ومش
فاضي أروح أماكن.

_ خليكم انتوا هنا في سيرة الناس، واكذبوا على بعض، وانهشوا
في لحم البني آدمين زي الكلاب، خلوا الدنيا كلها تتقدم وتسبقنا،
واحنا يدوب نسبق الأحداث ونؤلف قصص على الخلق.
تركتهم وأنا ساخط على تلك القصص التي يختلقونها، وعلى
تلك العقول التي تسمع لهم دون أن تعي ما يقولون، كيف يكون
ذلك البلوكامين المتخلف، وابراهيم الكاوتش، هما وسائل الاعلام
في المنطقة؟ ليقوموا بتأليف قصص خيالية على الناس فيصدقوها.
أنا لا أنكر أنني اقتنعت بالقصة التي ذكرها ابراهيم الكاوتش
صاحب الورشة، وجذبتني أحداثها وتشوقت لمعرفة نهايتها، ولكني
سخطت على الناس وهم يسمعون للبلوكامين الذي يؤلف قصة
من وحي الخيال، يجعل من نفسه هو البطل فيها، بل هو قائد
الحملة، عبارات لا يصدقها إلا شخص فاقد العقل، كيف يصدق
الناس أن المقدم يخفي سر الحملة عن اثنين من الضباط المعاونين،
ويفشي بيه للبلوكامين؟ بل كيف يصدق الناس أن المقدم يعرض

عليه أمام الناس إخلاء سبيل معارفه؟ بل يعطي أوامره للنقيب ليترك أحدهم يمشي، أي عقول تلك التي تصدق هذا المتخلف الذي يتكلم؟ والله إن هؤلاء و من يصدقونهم هم سبب تخلفنا. وصلت إلى منزل سلمى وأسرتها، فوجدت العائلة مجتمعة هناك، تحت قيادة رئيس الحزب النازي بالعائلة، عمها رأفت، ولم تكن المسكينة بينهم.

_ دي العيلة كلها متجمعة بربطة المعلم أهو.

_ إسمع يا أستاذ علاء، انت لازم تتجوز بنت ولا تتلقى وعدك

مني؟

_ وماله يا عم رأفت أتجوزها من غير تهديد، هتجوزها لأني عارف إنها عمرها ما تغلط، لكن انت عايز تجوزها لي وانت بتشك في سلوكها، عايز تجوزها لي علشان تقول للناس إنك البطل الهمام الي أجبرتني إتجوز بنت أخوك وأنقذ الفضيحة.

_ فين الفلوس الي هتتجوز بيها؟

_ أكيد انت يا عم رأفت هتسلفني فلوس أتجوز بيها.

_ وأنا أسلفك فلوس ليه، هو إنا الي غلظت.

_ مش انت الي عامل كبير عيلة وبتشخط وتنتر وعايز تحمي

عار بنت أخوك، يبقى انت الي تدفع.

_ أنا مش هدف غلظة واحد خسيس زيك.

_ يبقى ما تقولش مين يتجوز ومين يتطلق، الي عايز يعمل

كبير ويلم مصيبة حاصلة، يبقى راجل أد المصيبة، ويتكفل بكل مصاريفها.

_ انت عيل مش متربي.

_ بالعكس يا عم رأفت، أنا متربي، ومتربي جدا كمان، والدليل

مش هسيب خطيبتي في الظروف دي، مع إني مش سبب في حملها،
لكن هصبر لحد ما أشوف رأي العلم النهائي في حالتها.

_ ما انت عرفت رأي العلم خلاص، و انت المتهم.

_ أنا لو حكمت ع الموضوع من نظريتكم، ممكن أتهم بنتكم
بالخيانة، لأني عارف أي مش متهم، لكن أنا عاقل، واعتبرت كلام
الدكتور ده كلام عام، مش خاص بحالة سلمى، وهستنى أعرف
رأي الدكتور في سلمى نفسها، وبعدها أصدر حكمي ع الموضوع،
وسلمى دي جزء مني، وأنا واثق في تصرفاتها، وعارف إن التشخيص
الأخير هيكون في صفنا، وهستناه وهنتجوز.

_ الموضوع مش محتاج فلسفة.

_ أنا قلت محتاج علم مش محتاج فلسفة، والنهاردة هنزوح
أنا وهي وخالد للدكتور نفسه وتيجي إنت معنا يا عم رأفت،
ونسמע كلام الدكتور ايه.

_ أنا مش جاي مع حد، مليش دعوي بالموضوع ده.

_ إيه يا عم رأفت، بتحاول تكون بعيد ليه؟ مش يمكن تكون
النتيجة خير.

_ أنا مليش دعوى بالدكاترة، تروح انت وأخوها معاها وخلاص
لحد ما نشوف آخركم إيه؟

_ على فكرة يا عم رأفت، انت عايز تخرب البيت ده، وتكون
انت في السليم، و متقولش انك جاي تصلح الي اتكسر، أو جاي
تحمي العار، وإلا كنت صبرت للنهاية وانت ملهوف مستني تسمع
براءة بنت أخوك، لكن كل هدفك سمعة عيالك، وعايز أخوها
يبقى في وش المدفع علشان هو يقتلها، ويدخل المسكين السجن،
ويقعد أبوها جنب أمها في حسرتهم مدى الحياة.

حاول رأفت أن يستجمع أي كلمات يرد بها على اتهامي له بالسعي وراء خراب الأسرة وتدميرها، ولكنه لم يجد كلمة واحدة يدافع بها عن نفسه.

_ أنا جاي معاكم عند الدكتور النهاردة.

_ كده عين العقل يا عم رأفت، ومتخافش مش هخليك تدفع كشف الدكتور.

_ هترجع لقلة الأدب تاني.

_ أنا عايزك تاخذ الموضوع ببساطة يا عم رأفت، عايزك تنطش الناس وكلام الناس، عايزك تقتل شيطانك اللي بيوسوس لك ده، قبل ما تفكر تقتل بنت أخوك، أو تحرض أخوها يقتلها. لحد ما نستنفذ كل وسائل البحث عن الحقيقة، ساعتها نقتلها ونقتل خالد ونقتل أبوها وأمه نسمع رأي العلم ولو طلعت متهمه، نولع في البيت كله، وأنا أنتحر لكم وأوفر عليكم العيب ونعمل أحلى شغل لحساب الشيطان، اللي عايز البشر بركة دم من أتفه الأسباب.

_ هتروح الساعة كام عند الدكتور النهاردة؟

_ بعد العصر على طول يا عم رأفت.

_ وأنا هلاقيك فين بعد العصر.

_ أنا مش هتحرك من جنب سلمى وأمها لحد العصر يا عم رأفت، لو عايز تمشي انت اتفضل بس أنا كتفي هيفضل في كتف خطيبتي لحد ما الموضوع ده ينتهي.

_ تقعد جنبها ازاى؟ هي مراتك؟

_ أنا مستعد أسيبها خالص يا عم رأفت وأمشي، بس يا ترى هتقدر تقعد انت جنبها لحد العصر تهون عليها اللي جواها،

هتقدر تقعد تخفف عنها؟ مش حرام نروح ناكل ونشرب، ونسيبها في عذاب، وبعد كده نرجع لها نشربها عذاب جديد. مشى رأفت دون أن يجييني بكلمة، وانطلق خلفه قطيع العائلة، ذوي الأوعية الفارغة، التي يملأها بالسُّم عندما يحتاج إلى ذلك، ثم يفرغه إذا تطلب الأمر تفريغه، وان كانت الضحية جناح مكسور بالعائلة.

_ فين سلمى يا أم خالد؟

_ هتكون فين قلب أمها، في أوضتها هتموت نفسها من العياط.

_ طاب أنا عايز أدخل لها.

_ يا ريت يا ابني تدخل لها، دي مش بتفوق م اللي هي فيه غير وانت معاها، كأنك بتنفخ فيها الروح.

طرقت عليها الباب، وسبققتني إليها أمها تنبئها بقدومي، فاعتدلت سلمى في جلستها، ودخلت عليها وأنا مبتسم، لأمسح عنها ما تقاسي، بل لأدفع عن نفسي اتهامات عينيها اللتين تعاتبانني في صمت لأني تخليت عنها بضع لحظات، تعاقبني لأني صدقت شيطاني ووضعت الشك فيها بعد ما سمعت تشخيص الطبيب الذي وضعها موضع شك الجميع.

ابتسمت لها ولم تشفع لي ابتسامتي، ولم تطفئ نارا تحرقها من شتى النواحي، وكأن تجاهلي لها ليلة أمس كان بمثابة مادة سائلة تساعد على حرقها.

_ سيدي يا سيدي ع الجمال، ده احنا وعيانين زي القمر، أومال

في الكوشة هتكوني عاملة ازاي؟.

ظننت أن سلمى ستبتسم لي كالعادة، لكن عينيها كانتا أكثر حدةً وعتابًا مما كنت أتوقع، كنت أظن أنها فتاة مستسلمة،

تضحك لمداعبتي، وتحزن لتجاهلي، ولو عدت إليها بعد فترة من تجاهلي لها تفتح ذراعيها لتستقبلني بسعادة الأطفال في استقبال أيهم الغائب.

لم أكن أعرف أن سلمى تحبس بداخلها تلك الشخصية القوية التي تتمتع بمخالب القط المفترس تظهرها لو شعرت بإهانة كرامتها استغلالاً لوداعتها.

نظرت في وجهها وأنا أتقدم إليها بخطوات المذنب النادم، رسمت بين حاجبي علامات الاستعفاف مستغفراً لها عن تقصيري في حقها، فرأيت في وجهها علامات الشجب اللاذعة قرأت في انعقاد حاجبيها رسالة شديدة اللهجة، كلمات تتهمني بالضعف والهوان، والتخلي عن حبيبتى التي اعتبرتها قطعة مني لا يمكنني التخلي عنها أبداً.

لم أشعر بنفسى وأنا أتقدم إليها، وأجلسها بجواري وأمسك يدها، وأقبلها برفق لعل قبلاقي تخفف عنها شيئاً من الأسى، أو اعتذاري يجعلها تترفق بي فلا تشتد عليّ في عتابي.

_ أنا آسف جداً يا سلمى، مكنش ينفع أعمل اللي أنا عملته ده.

_ وانت عملت ايه علشان تعتذر عنه.

_ مكنش ينفع أطنشك امبارح.

_ وهو ده بس الذنب اللي ارتكبته في حقي يا علاء؟

_ و هو في ذنب أجرم من كده يا سلمى؟ أنا آسف جداً يا

نص روعي المتعلقة بين السما والأرض.

_ لو نص روحك يا علاء، مكنش كلام الدكتور أثر فيك بالشكل

ده، وخلاك فجأة تبقى زي عمي رأفت في نظرتك ليا، يمكن عمي

رأفت ببجي ويسأل بغيرسته، لكن انت هربت يا علاء، جريت
مني ودفنت راسك في الرمل، نسيت انك الوحيد الي بتططب
عليا في الغابة الي أنا عايشة فيها وكلها منتظرة لحظة دبحي.
أو جعتني كلماتها، ورفعت يدها ثانية وطبعت فيها قبله
طويلة، ووضعت يدي على فمها حتى لا تكمل كلماتها، ثم رفعت
عيني وصوبتهما تجاهها لترى دموعي، فوجدت دموعها أغزر
مني، رأيت فيهما البراءة من كل ذنب نقذفها به، لم تكن سلمى
تلك الفتاة التي تخطئ أبدا، ما كان لي أن أتخلى عنها ليلة أمس،
تلك الليلة التي ستظل نقطة سوداء في حياتي.
_ احنا خلاص هنتجوز يا سلمى، ومش هيهمني كلام الناس، أنا
اتعودت عليه خلاص.

_ هنتجوزني شفقة يا علاء مش كده؟ أنا مش هرفض الجواز
منك حتى لو شفقة؟ مش هرفض اللحظة الي تمنيتها طول عمري
حتى لو كانت نيتك تعمل خير في بنت مغلوبة على أمرها عارف
ليه يا علاء؟ لأني لسة شايفاك زي أول مرة اتقدمت لي فيها، كل ما
أشوفك بنسى المصيبة الي أنا فيها، بس انت شايفني بشكل تاني
خالص يا علاء، و بردو موافقة وإن كنت موجوعة جدا إننا نكلل
حبنا بجواز ستر العار يا علاء.

انفجرت في البكاء، واحتضنتها حتى كدت أن أعصرها، لم أستطع
سماع نبرات الحزن من سلمى، ولا أطيق كلمات الهوان والاستعفاف
تتوالى على لسان الإنسانية التي رأيت فيها أُمي.

_ متقوليش كده يا سلمى، أنا هتجوز البنت الي حبيتها
واتمنيتها، هتجوز الانسانة الي لو شفقتها بتغلط هكدب عيني
الي شافتها، و هصدق ثقتي فيها وإخلاصها ليا.

_ مشكلتك إنك مش بتعرف تختار كلام تفصل بيه بين المشاعر الحقيقية وشعور المجاملة يا علاء.

_ مشكلتك انك بقيتي بايخة من يوم الفيلم الهندي الي احنا بنصوره ده يا سلمى.

ابتسمت سلمى ابتسامة خفيفة وحاولت الهروب ببصرها بعيدا

_ يعني لما ربنا هداكي وهتضحكي، عايزة تخبيها، إيه يا عم القسوة دي، اضحكي بقى علشان أنا جايب لك مفاجأة بمليون جنيه.

_ مش عايزة مفاجآت.

_ خالي زاهر هيدفع لنا مليون جنيه، وهيكتب لنا شقة في البرج بتاعه الجديد، نتجوز فيها.

_ خالك زاهر مين ده؟ بتاع مصنع الجرانيت؟

_ قصدك مصانع مش مصنع واحد، وقال لي هدفك لك مليون جنيه واكتب لك شقة، وتتجوز في أقرب فرصة.

_ وانت علشان كده وافقت تتجوزني.

_ وانت تعرفني عني كده يا سلمى؟

_ أنا معرفش بئي.

_ انتي تعرفي إني ممكن أتجوزك علشان أستفيد بعرض خالي زاهر.

_ لا طبعا يا علاء مستحيل، بس إنت وافقت عليه اهو.

_ احنا في أمس الحاجة للفلوس، و للشقة كمان، وأنا ليا سنتين منتظر اللحظة دي، وانتي كمان

_ والمصيبة الي احنا فيها دي نسيته؟

_ المصيبة دي ان شاء الله ليها حل عند ربنا سبحانه وتعالى،
وأكيد الدكتور النهاردة هيفهمنا كل حاجة، أنا واثق فيكي جدا
يا سلمى، و لو دي حالة خارقة للعادة يبقى حظنا إنها تيجي في
طريقنا احنا الاتنين، يبقى نتقبلها بصدر رحب احنا الاتنين، وأدينا
هنستفيد بمليون جنيه وشقة فاخرة على ذمة المصيبة اللي بتقولي
عنها دي.

_ انت انسان عظيم يا علاء.

_ انت كل حاجة ليا في الدنيا دي يا سلمى.

تركت سلمى وانصرفت عائداً إلى منزلي بعد ما اتفقت مع
خالد أن نتقابل سويا بعد العصر حتى نعرض سلمى على
استشاري النساء والتوليد لنرى ما يقول فيها.

اتصلت بخالي زاهر وأخبرته أنني موافق على ذلك العرض الذي
قدمه لي صباحاً، لأنقذ ما يمكنني إنقاذه من سمعته وسمعة
ولده، تفادياً لخسارة منصبيهما الذين يسعيان إليهما، و حدد لي
موعداً قبل العصر لزيارته في مكتبه بالشركة لأستلم الشيك، وعقد
تنازل عن الشقة عليه توقيعه وشهادة اثنين من موظفي الشركة.
خرجت من شركة خالي زاهر إلى أقرب فروع بنك مصر وقمت
بتحويل المبلغ من حساب خالي إلى حسابي الذي أودعت فيه ألف
جنيه منذ فترة لربما أحتاج يوماً ما إلى وثيقة حساب بنكي، كمن
يعمل لنفسه جوازاً للسفر وهو لا ينوي الرحيل، وهأ أنا ذا قد
احتجت للحساب البنكي لأودع فيه رصيدي الجديد بقيمة مليون
جنيه .

عدت إلى سلمى وخالد في الموعد المحدد وأنا أظير من سعادتي،
لم تطأ قدمي الأرض من فرحتي.

لقد صدقت تلك المقولة التي كنا نكررها دون أن نتذوقها «من المحن تأتي المنح» فقد أتتني منحة بمليون جنيه من محنتي التي أعيشها وأتجرع مرارتها أنا وسلمى.

وجدتهما ينتظراني في مدخل باب البيت، وكان خالد ينوي أن نركب سيارة الميكروباص من أمام الشارع الذي يسكناه، ولكنني رفضت رفضا باتا أن تمشي سلمى في الشارع حتي تبلغ آخره، ثم تركب سيارة يعرفها كل من فيها، فتراقبها العيون الشامتة، وتطولها الألسنة المتسلطة، وتنال منها تلك الأفواه القذرة التي لم تتوقف عن النيل منا حتى الآن.

طلبت من خالد أن يأتي بسيارة تاكسي تصحبنا من هنا حتى موقف الميكروباص الرئيسي لنركب من هناك دون أن يرانا من يعرفنا فيعاقبنا بعينيه عقابا غير مبرر.

وصلنا إلى موقف الميكروباص وركبنا بين أناس أغراب لا نعرفهم ولا يعرفونا، فطمأنت نفسي أننا لن نسمع ما يزعجنا طول الطريق. تحركت السيارة، وبدأ الركاب في تبادل الأحاديث، انتبهنا للسيدات الثلاث اللاتي تركبن في المقعد الأمامي، فقد كانت أحاديثهن شيقة، وصوتهن عالي يجبرنا على الانصات إليه.

_ يعني انتي متخيلة يا أم هاني إن مرتبه اللي بيقبضه من شغله في وزارة الشباب والرياضة ده يخليه بيني عمارة تسع أدوار في سنة، انتي مستوعبة الكلام ده؟.

_ أنا مش بقول مرتبه يا أم منة، بس أنا قصدي إنه بياخد اكراميات، وبدلات، وبيسافر كتير تبع الشغل وبيأخذ بدل سفر. _ انتي طيبة أوي يا أم هاني، قوليلها انتي يا مدام فيفي العمارة دي بناها منين.

_ واحنا هنشغل بالنابيه ليه يا أم منة خليه في حاله.
 _ بس قوليلها الفلوس دي بيحبها منين.
 _ يا أختي ده بياخد رشاوي من الأندية بتاعت الكورة الكبيرة
 علشان القرعة والكأس والحاجات اللي بيعملوها دي، وكل نادي
 بيدفع له مليون جنيهه.
 _ والأندية هتدفع له؟ وانتي عرفتني الكلام ده منين يا مدام
 فيفي؟
 _ أنا ابني عضو في النادي في فريق السباحة وعارف كل الحركات
 دي.
 _ يعني ابنك في فريق السباحة وعارف كل اللي بيحصل ده يا
 مدام فيفي؟
 _ يا أم هاني الكلام اللي بقولك عليه ده حقيقي عايزة تصدقي
 صدقي.
 _ أنا مش بكذبك يا حبيبتني، بس أنا اللي أعرفه عنه غير
 كده، بس مش عايزة اتكلم عن حد.
 _ لا قولي يا حبيبتني ما احنا لازم نعرف الحقيقة.
 _ هو بيتاجر في المخدرات، بيروح النادي نبطشية بالليل ويسهر
 هناك، ومخبي المخدرات تحت العوارض بتاعت النادي، بيجوله
 العيال الفاشلين اللي بيشربووا حشيش، بيشتروا منه لحد الصبح.
 _ لا لا لا دي حاجة متصدقش أبدا يا أم هاني، ده مدير نادي،
 مش بيروح نبطشيات بالليل خالص.
 _ يعني هو مدير نادي الحتة بتاعتنا هيكون له تدخل في
 قرعة الكأس والكورة مع الأندية الكبيرة يا مدام فيفي، كلامك
 انتي اللي ميتصدقش.

اندمجت في حديثهم، ورأيت أن الركاب في حالة صمت ويتابعوهن، وينظر إليهن رجل أصلع تحت أنفه شنب أبيض كبير، فتوجه إليهم يحدثهم.

_ انتوا بتتكلموا عن عمارة حسين الصعيدي اللي بناها ولا إيه؟

_ هو في حد غيره الحتة كلها بتتكلم عنه وعن العمارة اللي بناها السنة دي.

_ الراجل ده بيتاجر في العملة، بيروح الصعيد ياخذ الدولارات واليوروهات من السياحة في بلدهم في الأقصر، ويرجع بعد كل فترة يوزعها هنا في القاهرة، وبيكسب فيها.

_ أيوة يا خويا كلامك صح، ده معاه بزارين في الغردقة.

_ لالا يا مدام البزارات دي مش بتاعته لوحده ده شريك فيها.

ابتسمت ابتسامة ساخرة وأنا أنظر إليهم، وقد تناوبوا نهش ظهر الرجل الغائب المسكين فاتهموه بالرشوة، واتهموه بالتجارة في المخدرات، وأخيرا يتهمه أحدهم بالتجارة في العملة وكلها قضايا جنائية تكفي لإخفائه في غياهب السجون ما تبقي من حياته.

و هنا وقف السائق في منتصف الطريق بقوة، واتجه ناحيتهم

غاضبا، يكلمهم بلهجة شديدة.

_ بصوا كده يا جماعة علشان تبطلوا الهري ده كله، حسين

الصعيدي يبقى صاحب العربية دي اللي انتوا راكبينها، أقسم بالله الراجل ده من المنيا مش من الأقصر علشان تقولوا بياخذ العملة من السياحة، و هو شغال شئون عاملين في مركز الشباب، مش مدير النادي الرياضي بتاعنا علشان متقولوش انه بياخذ رشوة من الأندية الكبيرة، و النادي بتاعنا مش يلعب في دوري الدرجة الثالثة حتى.

_ وانت مالك محموق علينا كده يا أسطي، ما تبص على طريقك.

_ ما انتوا نازلين حقد ع الراجل، وممكن الحقد ده يا جي في العربية بتاعته، نعمل بيها حادثة كلنا.

_ يا ساتر يارب، فال الله ولا فالك، امشي يا عم ربنا يستر طريقك.

_ يا ريت نوقف كلام في الموضوع ده، خلي ربنا يسهل لنا طريقنا.

أعجبني موقف السائق وتصرفه الذي أظهر كذب الثلاثي النسائي وذلك الأصلح ذو الشنب الأبيض الذين مزقوا جسد الرجل في غيابه، ولكني أعلم تماما أنهم لن يأخذوا العبرة من ذلك الموقف أبدا، حتى تحرك الرجل الأصلح ناحية السائق وحدثه بصوت عالي.

_ ما تقول لنا يا أسطي هو جاب الفلوس دي مين، ده ساكن ما بيننا من زمان، مشفناش عليه النعمة دي.
_ دي لعبة آثار كبيرة يا عم الحاج، اشترك فيها وأخذ نصيبه، وطلع له فيها عشرين مليون جنيه.

يا للصاعقة! حتى أنت أيها السائق تشترك معهم في تأليف مصدر لمال الرجل الغائب عن الحوار، ليتنا نهتم بشئوننا ونترك شئون الناس لهم، فلسنا من يملك حسابهم.

وصلنا إلى موقف الميكروباص، ونزلنا جميعا من السيارة، وفوجئنا بأحد السائقين قادم ناحيتنا مسرعا ينادي على السائق.

_ يا أسطي بيشو، يا أسطي بيشو.

_ في إيه يا حمام.

_ سمعت باللي حصل للعمدة حسين الصعيدي صاحب العربية بتاعتك .

_ ماله حصل له ايه؟

_ العمارة بتاعته اللي في الحتة بتاعتكم وقعت، ولما سمع الخبر وقع من طول، وحاليا محجوز في المستشفى.

يا إلهي على ذلك الخبر المؤلم، قد أوجع كل المحيطين بي، تألموا على رجل لا يعرفونه، ولم نسمع عنه شيئاً سوي في تلك السيارة.

تقدم رجل عجوز يبدو متماسكا، وسأل حمام:

_ والعمدة حسين أخباره ايه دلوقتي يا حمام؟

_ والله يا عم الحاج هو في العناية المركز بين الحياة والموت.

_ لا حول ولا قوة إلا بالله العلي العظيم، الراجل باع أرض أبوه

الي في الصعيد بالقيراط لحد ما خلصها بيع علشان يبني العمارة دي، ويعيش على ريعها، حسبي الله ونعم الوكيل في كل عين شافتها واتكلمت عنها.

يا للهول! ما الذي أسمع، العمدة حسين الصعيدي لم يكن مرتشياً، ولا تاجر مخدرات، ولا مروج للعملات، ولا حتى تاجراً للآثار، ولكنه باع أرض والده، خسر كل شيء، وألسنة الناس لا ترحمه، ألسنة الناس وعيونهم دمرت ما بناه. وقتلته في سمعته، ثم جسده.

أف لهذا المجتمع الذي اعتاد اختراع الأكاذيب والتهم الباطلة ليصدقها ثم يتداولها على أنها حقيقة.

كنت أعتقد أن حارتنا وحدها هي المتريفة، وأننا فقط من يتعرضون لتلك الألسنة لتنال مني تارة، ومن سلمى أخرى، لكنه وباء قد تفشى في كل مكان، وأصاب كل المناطق والحالات.

مشيت بجوار سلمى وخالد وأنا أقلب كفيّ على ما سمعته من تلك الأقاويل الفاحشة بحق ذلك الرجل المسكين، بل تأثرت أكثر بما تعرض له نهاية المطاف، قد تهاقت عليه الألسنة وتناولت عليه الأعين حتى أسقطته أرضاً، و قد خسر كل شيء، هل سيعوضونه ما خسر؟ أم يحيون فيه ما تلف منه؟.

وصلنا إلى العيادة، فوجدناها مزدحمة على آخرها بالناس، فتقدمت ناحية الموظف المسئول وحجزت رقماً بين الحالات المنتظرة خارج غرفة الكشف، وعدت للخلف خطوات وجلست جوار خالد وسلمى، يغلب علينا الصمت الرهيب الذي رافقنا منذ خروجنا من بيت سلمى حتى وصولنا للعيادة.

كنت أنظر إلى خالد وأنا في حيرة من أمره، كيف حاول تعليق المشنقة ليقتلها بعد تكبيل يديها ورجليها وتكميم فمها؟ كيف تجرأ على ذلك وقد كاد أن يصل لتحقيق ما أقدم عليه؟ لولا أن أرسلتني العناية الإلهية إلي هناك في الوقت المناسب لأنقذ الموقف وأبعث لها أملاً في الحياة من جديد.

كيف تحول خالد فجأة إلى ذلك الأخ الطيب الهادئ الذي يطيع حركاتنا ويتبعها؟ كيف حمل نفس الأمنية التي نحملها بداخلنا؟ وهي أن نجد مخرج من تلك الأزمة دون أن نمس سلمى بسوء؟ بل كيف وصل إلى أن ينتظر معنا لحظة زواجنا التي كنا ولا زلنا ننتظرها؟.

توجهت إليه ببصري لأسأله وأقنع نفسي بأي إجابة يقولها، فوجدته ينظر بشغف على أحد أركان العيادة، وقام من مكانه متقدماً ناحية أحد الزبائن الجالس أمامنا.

بعيد بيتطوح وسكران وشارب حشيش لما داخ، وعمال يغني يا
اما القمر ع الباب نور قناديله الباشا المفتش خرب بيته، واتحول
للتحقيق واتفصل من الخدمة نهائيا.

_ يا سلام ع الأيام يا ولاد، يعني هو مفصول من الخدمة من
يوم عيد المسيحين اللي فات وبيكذب على الناس إنه شافني
أنا وسلمى في عيادة مشبوهة من أيام قريبة، والناس الأغبياء
مصدقينه، و شوف ربنا سبحانه وتعالى بيعاقبه ازاي في لحظتها
بسرطان الرحم في مراته.

_ ايه قال عليك انت وسلمى؟

_ هحكيلك واحنا راجعين، يا ريت بس يتعظ ويبطل كلام عن
الناس.

نظرت ناحيته فوجدته يراقبني بعينين دامعتين، هربت من
عينيه حتى لا أعذبه بنظراتي، فلا أتمد تذكيره بما ارتكبه في حقي
دون أن يعرفني ليصيبني في عرضي.

طلبت من سلمى أن نقف بالخارج بعيدا عن زحام العيادة،
حتى نستطيع التقاط بعض الأنفاس بعيدا عن هذا الجو الكئيب
الممتلئ بالمرضى، فعظم تلك الحالات لم تأت للمتابعة الدورية
للحمل، أو للكشف عن الحمل من عدمه، فتلك الأمور يترددوا
فيها على الأخصائيين وحديثي التخرج، أما تلك الأعداد في عيادات
الاستشاريين ليس وراءها سوى حالات خطيرة تعاني من شيء ما،
أو تتخوف من شيء ما، ليحملوا بين ظهرانيهم آلاما نفسية وأخرى
عضوية.

تركنا خالد بالعيادة ينتظر موعدنا في الكشف لينادي علينا،
ووقفنا في تلك البلكونة المستديرة المطلة على الشارع، و كان المنظر

رائعا من الطابق الحادي عشر.

_ يا سلام يا سلمى ما تكون شقتنا الي في برج خالي زاهر
زي كده.

_ انت فعلا وافقت على الفلوس والشقة علشان تلم الموضوع
من الفضايح؟

_ لا يا سلمى، أنا بستغل الفرصة الي منحها لي إنسان مش
بيبي غير على مصلحته، وجاي يعمل عليا أنا شريف وبينقذ
سمعته بفلوسه، أبقى مغفل لو رفضتهم.

_ أنا تعبتك معايا يا علاء، بس والله ما بيدي، أنا زيي زيك
في الورطة دي.

_ عيب عليكي يا سلمى متقوليش كده، ده أنا مش عارف
أودي وشي منك فين بسبب اليوم الي غبته عنك، مكسوف منك
والله، ورسالتك لسة بتخطر فيا.

_ كنت هموت والله يا علاء فيها اللحظة دي ، الدنيا كلها
كانت ضدي وبتتأمر على قتلي وبردو مكنش يهمني، حتى أخويا
خالد الي كان يشك فيا من اللحظة الأولي، مكنش فارق معايا،
كنت حاسة وجودك جنبي وثقتك فيا كأنها جبل أكبر منهم كلهم
بيسندني، وفي لحظة يا علاء لقيتك بتبعد، ولما عرفت تشخيص
الدكتور من خالد اتجننت، قلت ده أكيد سبب بعدك عني، أكيد
ده الي خلاك تتجاهل وجودي فجأة.

_ أنا آسف جدا يا سلمى، غلطة ومش هتكرر، مهما كان
التشخيص الي هنسمعه دلوقتي مش هسيبك.

_ تسلم لي يا علاء، كانت هتصعب عليا نفسي لو مُت من غير
ما نتجوز وأبقى جنبك في بيتك حتى لو شهر واحد.

_ أَلف بعد الشر عليكِ يا نص روعي.

_ مهما كان كلام الدكتور يا علاء هفضل نص روعي؟

_ مش عايزين نسبق الأحداث يا سلمى.

_ امممممم معندكش إجابة ولا إيه؟

هنا توقفت وسألت نفسي ماذا لو قال الدكتور أنها حامل في شهرها الثاني أو الثالث؟ والتشخيص تلك المرة نهائي لا يقبل الطعن عليه، فهل أثبت على موقفي وأتم الزواج؟ و ماذا بعد الزواج؟ هل تلد سلمى في الشهر السادس أو السابع؟ وإن أنجبت طفلا فأب ذلك الذي أسجله باسمه؟ من والد الطفل الآن رغم براءة سلمى من الخطيئة، وأنا على يقين من ذلك؟.

تذكرت تشخيص الطبيب لحمل العذراء حينما قال أنه قد ينتج عن قذف دون إيلاج، أو حتى عن إيلاج وعملية كاملة ولكن الغشاء كان مطاطيا، فهل يا ترى سيقول الطبيب أن شيطانا قَدَفَ فيها؟.

ماذا لو كان الغشاء مطاطيا؟ هل يساورني شك فيها؟ وإن لم يكن مطاطيا حتى، هل أشك في قيامها بعملية جنسية ناقصة؟ مالي أثق فيها هكذا؟ هل دفعتمني أموال خالي زاهر لأتم زواجي بها قبل الوقوف على الحقيقة؟ أم أن ذلك إشفاقا عليها رغم كثرة أحاديث الناس التي بدأوا يبتكرون أحداثها من مخيلاتهم؟.

بدأت سلمى تنظر لي دامعة بسبب تأخري عن الإجابة، وكأنها قرأت أفكارى التي تراودني الآن، بدا عليها معرفة ما يدور بداخلي من خلال ملامحي وسكوتي.

_ إيه يا علاء، مفيش إجابة ولا إيه؟.

نظرت إليها ودموعي تنهمر وشعرت لأول مرة بالعجز عن الرد،

مخاطبتي لنفسي في تلك الحالة كانت أخطر من زيارة الشيطان.
_ أقسم بالله يا علاء عمري ما عرفت حد غيرك، ومش عارفة
المصيبة دي جات لي منين.
نظرت في عينيها فقرأت فيهما صدقا أعرفه، براءة أعتبرت نفسي
أكثر من يعرفها ويؤمن بها.
_ وأنا مش هسيبك يا سلمى، أنا واثق إنك متغلطيش، و مهما
قال الدكتور أنا جنبك.
ابتسمت سلمى حتى انفجرت أساريها، ودخلت الدموع
فمها، فاحتضنتها داخل العيادة.
أحسست من بكاءها أي احتضن طفلة يتيمة فقدت والدها،
طفلة تنتظر مستقبلا أسودا لا تعرف آخره، طفلة تبحث عن
يعولها ويحميها من مخاطر الحياة، طفلة تستشعر الغربة بين
أناس لا تعرفهم، وتبحث عن أقرب الأرحام ليحتضنها فيشعرها أن
لها عزوة تقضي على وحدتها.
_ حاسة إني داخله على جحيم يا علاء.
_ جحيم ايه يا بابا وأنا معاك؟
_ بابا! ياااااااا! أديه الكلمة دي بتخليني طفلة في حضنك؟
_ ياااااااااااا! لو خالد طلع وشافنا في أحضان بعض، هيصدق إن
شكوك عمه رأفت كلها في محلها، والمرة دي ثورته هتكون أقوى
من عضلاتي وهيحدفنا من هنا.
هنا أطلقت سلمى عدة ضحكات متتالية وضحكت معها،
وخرج علينا خالد من العيادة بالفعل ينادينا فقد أخبره التمرجي
أنه قد حان موعد دخول سلمى لغرفة الكشف.
نظرت في وجهها فرأيتها ترتعد خوفا تتقدم بخطوات مهتزة،

كأنها تتقدم ناحية مقصعة الإعدام، وكأن الطيب هو ذلك الجندي الغليظ مسئول تنفيذ الحكم فيها.

قلبها يصدر صوتا في تنالي نبضاته، وصدرها يعلو ويهبط كتلك البالونة التي ينفخ فيها طفل صغير، فتمتلئ هواءً تارة، وتفرغ هواءها أخرى.

كنت من قبل أنفخ فيها من طمأنينتي هدوءً يسكن خوفها، وأشعرها بأمان وجودي حتى لا تخشى شيئا، بل كنت أفرغ من قوتي على ضعفها فتبدو أكثر ثباتا، ولكني الآن أمتص من خوفها رعبا يتضاعف بداخلي، وأحتسي من سخونة أحاسيسها الملتهبة بنار الترقب حساءً يلهب كياني، جعلني أتمنى لو يموت الطيب قبل توقيع الكشف الطبي عليها، أو يموت أحدا فتنشغل الدنيا بموته، بل أموت أنا، حتى أحقق حلمي في الهروب من تلك الموقعة.

دخلنا على الطيب، وقررت تلك المرة ألا أخرج من غرفة الكشف وإن تكشفت سلمى أمامي فتلك المصيبة التي نترقبها أكبر مما يدفعني للبقاء بعيدا عن أريكة فحصها.

لم أكن أنظر في جسد سلمى، ولا حتى وجهها كما اعتدت النظر إليها لأبعث فيها روح الطمأنينة، ولكني تلك المرة كنت أنظر في عيني الطيب، لأقرأ تشخيص الحالة قبل أن ينطقه لسانه.

وجدته يندهش، ويعيد الكشف مرة تلو المرة، وينظر في التلفاز مرات عديدة، حتى بدا الخوف يحتل مكانه في وجه خالد هو الآخر، خالد الذي تحول فجأة إلى إنسان يشعر مثل شعورنا، ويرق قلبه لأخته ويتمنى نجاتها من كل ما أصابها.

رفع الطيب رأسه ونظر إلينا قائلا:

_ مين اللي قال لكم إن الأنسة حامل؟

_ ثلاث دكاترة يا دكتور.

_ ثلاث دكاترة ولا ثلاث محششين مسطولين؟

بدأت الدهشة تأخذ مكانها في وجوهنا، خالد يفتح فمه كالحائر، لا يعرف بماذا يشعر، هل يفرح؟ أم يتعجب؟ أم يستنكر؟ حتى سلمى نفسها التي كانت آيلة للسقوط منذ قليل، قامت منتصبّة تنظر في وجهي أنا لتستفسر عن تشخيص الطبيب، ولم تنظر إلى الدكتور نفسه.

_ معلش يا دكتور ممكن تفهمنا ايه اللي شفته.

_ الآنسة زي الفل ومش حامل، و مش بتعاني من أي حاجة.

_ طاب وكلام الدكاترة دي تسميه ايه؟

_ أنا معرفش دكاترة ومليش دعوى بحد، أنا استشاري نساء وتوليد، وتلاميذي أطباء كبار متقوليش كلام الدكاترة ولا كلام الممرضين.

_ حضرتك غني عن التعريف يا دكتور، بس معلش استحملني، في ثلاث أخصائين قالوا انها حامل.

_ على ما اذكر إنكم قلتولي إن أول حد قال لكم كده ممارس عام في المستشفى.

_ فعلا يا دكتور حصل.

_ للأسف الشديد يا ابني، أنا وزميلي من مختلف التخصصات بنستقبل شكاوي كتير من تشخيصات الأطباء الشباب، أنا منكرش إن فيهم أطباء كويسين جدا، بس أكثر من 25% من الأخصائين والممارسين، ليهم تشخيصات خاطئة وبينتج عنها بلاوي، لا سيما الفترة الأخيرة دي، عموما ألف مبروك عليكم براءة بنتنا سلمى، و دلوقتي أقدر اقول لكم اتفضلوا.

كانت الفرحة في وجه خالد وسلمى آنذاك لا توصف، والطبيب يقف منتظرا خروجنا، فحالتنا لا تحزنه ولا تسعده، فكم من حالة مرت عليه بها العجب العجاب.

خرجنا من العيادة ونحن في قمة السعادة بظهور البراءة، ولكن من ينقل خبر براءتنا من كل تلك القصص التي تداولها نشطاء كلام الناس؟ كان لا بد لنا من القيام بأي تصرف ينشر ذلك التشخيص على الملأ حتى يعرف الناس أنهم ظلمونا بكلامهم، وليسمع منا من سمعوا عنا، أن ما سمعوه محض أكاذيب، وليعرفوا أن من روجوا لها لم يكونوا صادقين حينها، ولن يصدقوا أبدا.

ركبنا السيارة في طريق العودة نفكر كيف نمحو كل ما قيل عنا، وهنا باغتتني سلمى بسؤالها

_ هو ليه جُرم المرأة أشنع من جُرم الرجل؟

فاجتتني سلمى بذلك السؤال ولكنها صاحبة الحق في البحث عن إجابة له، لأن الألسنة لم تتركها، بل تناولت عليها واعتبرتها المجرمة الوحيدة تارة، والشريك الأكبر معي في الجريمة تارة أخرى، وكانت صاحبة نصيب الأسد في كل الاتهامات، فسألت نفسي هذا السؤال وسرحت بعيدا عن الحوار، فوجدتني أجيب نفسي بإجابة أقنعتنني، ردها عليّ صدي صوت خيالي تقول:

_ لأن المرأة قطعة شفافة من الماس، تخدشها الإحتكاكات، و قد تترك فيها بعض البصمات لو تقاذفتها الأيدي.

أما الرجل فهو خزينة حديدية تحتضن تلك الماسة، حتى إذا ما احتضنت الخزينة ماسة أخرى لا يضرها في شئ.

و هذا لا يعني أن الخطأ مباح للرجل ومحرم على المرأة، فخيانة أحدهما للآخر جريمة بشعة مهما كانت علاقتهما،

ومهما كان شكل الرباط الواصل بينهما فالخيانة في ذاتها جريمة. ولا أقصد بالخيانة هنا ذلك الجرم الأعظم .. كلا بل هو كل احتكاك يرفض أحد طرفي العلاقة رؤية الآخر عليه.

ولكن جرم الرجل أخف وطأة، فالخزينة الحديدية لا تعكر هيكلتها القبضات. أما الماساة فتحتاج إلى إعادة تلميع من أرق اللمسات.

قد يفهم البعض أنها نظرية المجتمع الذكوري الذي يعطي الرجل حق الخطأ مع الحصول على مسامحة المرأة، ولكنه يسلب حق المرأة في الخطأ مع حصولها على نفس السماح، باعتباره الأقوى وهي الضعيفة المنكسرة الواقع عليها إهانة ذلك المجتمع. _ ساكت ليه يا علاء؟

_ مش عارف أقولك إيه يا سلمى.

_ قول لي رأيك، هو ليه البنت لو غلطت نفس غلطة الراجل، بيكون عقابها أشد وسمعتها أكثر عرضة للتشويه، مع إن الراجل بيكون عادي جدا ولا كأنه غلط.

_ مفيش حاجة اسمها ولا كأنه غلط يا سلمى، بس تقدري تقولي إن البنت زي القماش الغالي مينعفش نبهدله ونغسله ونرجع نبهدله ونغسله علشان قيمته متنزلش، لكن القماش الخشن بيتعرض للاتساخ، وبنقول عليه وسخ وبنغسله، لكنه مش بيتأثر بتكرار الغسيل زي النوع الغالي، بس ده ميمنعش انه لما يتوسخ بنقول عليه وسخ، ولو اتساخه اتكرر يا سلمى، المجتمع بيعزله عنه بطرق مختلفة.

_ برده النظرة دي ظالمة جدا للمرأة يا علاء

_ لكنها موجودة و مقنعة يا سلمى.

هز خالد رأسه ونظر إلينا

_ طاب ممكن نشوف لنا حل للي بنفكر فيه.

_ الحل الوحيد إننا نقدم شكوى في الدكتوراه ناهد والدكتور راشد والممارس العام بتاع المستشفى، ولما الناس تعرف سبب الشكوي، هيعرفوا إن التشخيص الخاطئ اللي شخصوه لسلمى كان غلط، وانها طلعت مش حامل ولا حاجة.

_ داهيا دماغك حاضرة يا علاء، وفيها حلول لكل المشاكل، ربنا يخليك ليا يارب.

_ تسلمي لي يا عمري.

_ ما تراعوا وجودي، و بلاش فرحة التشخيص تنسيكم إنكم لسة مخطوبين.

_ هانت يا خالد وهنتجوز أخيرا، بس انت تنشر بين أصحابك اننا اشتكينا الدكاترة دول لنفس السبب.

وصلنا إلى الحارة ونزلنا من السيارة ودخلنا على أم خالد وأبو خالد، فوجدناهم ينتظرونا على أحر من الجمر، كنت أظن أن خبر براءة سلمى من الحمل سيطيّر إليهم ليصل قبلنا، كما طار خبر الحمل إلى مسامع خالد، فوجدناه ينتظرنا بالمرصاد ليقدمنا للمحاكمة.

وجدناهم يتوقعون أحد الأمرين، إما نتيجة صعبة أو نتيجة مريرة، ولم يخطر ببالهم أبدا أن النتيجة هي البراءة، هي السلامة، هي قطع ألسنة المتكلمين والمتطاولين على الأعراض بالقصص الكاذبة.

قدمنا الشكوى وأحيل الأطباء الثلاثة للتحقيقات، واستدعينا أولئك الشهود الذين سمعوا الأخبار بالمستشفى والعيادة ثم

نشروها بالخارج، وأقروا بأن طبيب المستشفى والدكتور راشد أكدوا حمل سلمى، وشهد الدكتور راشد بأن الطبيبة ناهد السعدي هي الأخرى أكدت له حملها وعذريتها.

كان تقرير استشاري النساء والتوليد كافيا لمعاقبتهم من وزارة الصحة ونقابة الأطباء، وقد تم تهديدهم بغلق عياداتهم، وإبعاد الممارس العام عن الاحتكاك بالمرضى نهائيا.

وترك أهالي المنطقة الأحاديث حول علاقتي بسلمى، واتجهوا اتجاهها كلياً للحديث عن أخطاء الأطباء من ذوي التخصصات المختلفة، فمنهم من قال أن طبيب الباطنة قام بعلاج والدته من مرض السكري لمدة عام كامل، ثم اتضح أنها لم تعاني من السكري في حياتها أبداً.

حتى البلوكامين بكري قال ان والده تعرض لحالة نفسية صعبة، فعالجه طبيب الباطنة بأنه ضغط مرتفع، وشخصها طبيب العظام أنها حالة هشاشة في العظام، وطبيب المخ والأعصاب أنها حالة تصيب الأعصاب، حتى اتضح لهم مؤخراً بأنها حالة نفسية قد تسببت له في كل ذلك.

قمنا بتحديد موعد الزفاف، ودعونا كل الأصدقاء و الجيران، وتعمدنا دعوة أصحاب الألسنة الكاذبة الذين عرفت ألسنتهم أروع المقطوعات في حكايتنا، على آذان الناس الصاغية تسمع وتصدق فتندesh وتسب وتشتم في أخلاقنا.

لتكون في النهاية محنة حمل سلمى، خطيبي العذراء، بمثابة المنحة التي كشفت لي عري ذلك المجتمع العاهر فكريا، والذي يعتزل فيه سليمي النية في خنادقهم لا يخرجون.

كشفت لي عن ضعف خالي المليونير ذو النفوذ القوي، والذي
خاف على سمعته من حكايتي مع سلمى.
كشفت لي عن كذب الكثيرين ممن يحيطون بي، بل كشفت لي،
سذاجة الباقين الذين يستمتعون بأكاذيبهم ويتفاعلون معها كأنها
حقيقية يهتز لها وجدانهم.
كانت منحة ربانية، بعد نجاحي في التعاطي مع المحنة، والصبر
عليها، حتى فزت بمبلغ مالي من خالي زاهر بك والذي ساعدني
على الزواج من سلمى في فترة قصيرة لم أكن أحلم بها من قبل.
ليت الناس تترك الناس في شئونها، وتنتبه هي الأخرى لشئونها،
حتى تسير مركب الحياة، دون جزر رملية تعوق حركة الجميع.
ولكن يحضرنى هنا سؤال .. حتى متى تتطير أخبار الفاضحة
وتتناقل الأخبار المفرحة!؟

تمت بحمد الله

